

觀音義疏記卷第一

遵九

宋四明沙門知禮述

釋疏二初釋題目二初正釋題義者宜也謂
 解釋經文使合宜也又義理也斯蓋智者入
 法華三昧於觀行位中見第一義理以此義
 理解今經文疏者通意之辭又音疎即疏通
 疏條之義也二說記人二釋疏文二初預分
 章段二初叙二家三段此品既是識師為北
 涼沮渠蒙遜別傳于世故涼陳已來講者甚
 衆於是分節經文三段有異二今師下示天
 台多種二初泛明多種分文二若作下正依
 二段節目二就前下正釋經文二初前問答
 二初分科二一爾下隨釋二初問四初時節
 二初釋字義二即是下明悉檀二初別釋相
 四初世界東方西方隨機樂欲二或可下為
 人或有根性關於前品已得世界故云喜竟
 今聞此品即生宿善三或可下對治疑破解
 事屬於對治疑破悟理屬第一義今從解事
 當第三悉四或可下第一義二土者謂淨光
 莊嚴土八萬四千隨妙音者此土華德及四

萬二千天子因彼菩薩來往得道今八萬發
 心悟在觀音二諸佛下總明悉如來如鼓四
 機如桴擊之有聲聲不孤發今乃四機扣佛
 之時也二標人二初釋別名三初中道對小
 此菩薩名由證中立中必不偏今偏從無盡

者為對小乘是滅盡法特彰中道性無盡故
 小乘盡智者謂我見苦已斷集已證滅已修
 道已如是念時無漏智慧見明覺也無生智
 者謂我見苦已不復更見斷集已不復更斷
 盡證已不復更證修道已不復更修如是念

時無漏智慧見明覺也二又云下三諦明圓
 二初總示二大品下列示三初圓空無盡揀
 析示體故云即色是空應知體空通衍三教
 通則但體生死即空此偏空也別圓能體涅
 槃亦空此中空也離邊屬別即邊屬圓今在

圓也圓中名空此空無盡二又大下圓假無
 盡二初引經示相三初大集約八十明假二
 初本土所修此是妙假具於三觀不滅故假
 不生故空不出故中蓋不流出二邊故也此
 觀觀佛具觀三身至分證位名為見佛一切

佛法無不現前且舉六度耳二身子下依法
 立字二初身子問二菩薩答具彰願行願行
 無盡名於此立因緣果報即依苦集立誓因
 緣集也果報苦也為一切等依滅立誓以一
 切智及五分等佛果法故眾生性下依道立
 誓以順法性教化眾生知道法故皆云發心
 知是立誓又檀下依誓立行萬行皆為檀等
 攝也稱波羅蜜行到果也若願若行皆無作
 故方得無盡凡八下結上願行皆即法界是
 故皆舍一切佛法二又淨下淨名就二諦明

假有為是俗可盡之法無為是真不可盡法
 小乘智淺盡於有為住於無為故歸灰斷圓
 人觀俗即是妙有故行萬行觀真能達不空
 之真是故不住三無為坑是故二諦皆是常
 住不思議假故名無盡三華嚴約十藏明假

新經二十十無盡藏品云菩薩有十種藏三
 世諸佛皆說所謂信藏戒藏懃藏愧藏聞藏
 施藏慧藏念藏持藏辯藏乃至云此十種無
 盡藏有十種無盡令諸菩薩究竟菩提何等
 為十饒益一切眾生故以本願善迴向故一

切劫無斷絕故盡虛空界悉開悟心無限故
 迴向有為而不著故一念境界一切法無盡
 故大願心無變異故善攝取諸陀羅尼故一
 切諸佛所護念故一切法皆如幻故是為
 十種無盡法能令一切世間所作皆得究竟
 無盡大藏二如此下結經明假三又如下圓
 中無盡二初引經示相四初勝鬘約佛光明
 中以一切法皆佛法故法無不中中故常住
 常住故無盡二大品約法界明中法界體是
 大總相故諸法皆趣如提綱領毛目悉歸造
 境皆中何法非總今特言蓋為釋經意為
 法界理必雙非名無盡者名偏意圓故例真
 常實無邊倒今釋無盡上下皆然三淨名示
 即邊是中空有當體皆是圓中中性不改豈
 可有盡此之無盡蕩二邊情是故能空盡與
 不盡故知下結成圓中是真無盡四大品明
 諸法皆中修惡全體是性惡故十二因緣及
 以五陰一一如空常住周徧非當宗義此文
 莫銷二如此下結經明中三通達下從德立
 名二初正立名能達之意從所達法得無盡

名學者須了意即三諦無別所達能達亦無
 若其不然非無盡意二亦名下例諸法心智
 五陰及一切法既即三諦故皆得立無盡之
 名二菩薩下釋通名三初對梵翻名二約華
 釋義二初釋眾生二初通明因果能生實法
 所生假人始自凡人訖尊極人莫不從於眾
 法而生二別明菩薩從於無盡眾行而生故
 曰眾生二發心下釋餘字又約上求下化而
 釋前以眾行生已假人今以道法成他眾生
 三廣釋如別三敬儀二初分經二起者下隨
 釋三初釋起二初事釋禮即曲禮彼云請業
 則起請益則起鄭氏注云尊師重道也起若
 今樞衣前請也業謂篇卷也益謂受說不了
 欲師更明說之今無盡意欲請觀音利他之
 業欲益己心菩薩之行故從座而起二觀釋
 三初約空論起文有二意初明空觀不著諸
 法次明空觀自不著空故名起二又善下
 約假論起即不起滅定現諸威儀也三又中
 下約中論起中道遮照皆絕待對故起不起
 無非中實即遮之照名不起之起此起自能

起發中實亦能令他起發中實二偏袒下釋
 袒二初事釋二初約西土二此方下約此方
 言須賈謝張儀者合云張祿字之誤也元是
 范雎魏人也初仕魏與中大夫須賈使於齊
 齊以雎為賢私賞金璧及牛酒須賈嫉而怒
 之使還讒雎於魏相魏齊云范雎以魏密事
 告齊魏齊大怒拉脅折齒遺糞棄之廁中
 雎不死求守園者出之雎既得免易姓名曰
 張祿隨秦使王稽入秦見昭王昭王之拜
 為客卿稍遷左丞相後須賈為秦使雎乃微
 服而出杖於路賈見而大驚問雎曰復說於
 秦乎雎曰逃亡之人免死而已何敢說秦乎
 又問雎曰秦相張君子知之乎雎曰主人公
 亦得接近賈曰今欲因于請謁張君於是同
 詣下車守門者驚起正色賈疑之雎入而不
 出賈問門人知是秦相失色戰懼脫冠肉袒
 請入謝罪雎乃數而怒之及賈使還雎曰為
 我報魏君今斬魏齊不然我將圖魏矣魏齊
 後乃自縊魏王斬首送秦二觀解以事表理
 既成法門可以修觀故名觀解三釋合掌二

初釋合掌二初事釋二觀解二初表權實昔分今合順部表觀百界一念權實昭然二又五下表事理殊悟合法性五陰凡聖豈殊但聖出纏衆生在染染中性陰起生死陰以為能感故使聖人出纏實陰起於權陰而為能應感若復性應則歸真故以兩掌表今方合欲令行人即觀事陰合於性陰二釋向佛文唯觀解而有二意初直明向佛次兼合掌明向義四正發問二初分文立意三初帶總分節二大經下問答功德三釋論下簡示今問二世尊下依文釋義三初釋稱歎二觀世下釋所問三何因下釋正問二初問能成因緣二初別取境智境是機感智即聖應感應名局因緣則通二若就下互通凡聖因親緣疎互論因發互論緣助二名觀下問所成名號因緣是實法名號是假人攬實成假也二佛答二初分科二數者下隨釋三初總答二初貼文二初明機四初標人數二初舉多數三初釋經略示經文所舉百十萬億非謂十界共有此數蓋指一業有如許人二如一下

同受一苦以苦驗人知同一業若不然者那得同受一品苦邪三將此下以例諸趣二所以下明多意凡地發心尚能徧攝果中濟物豈有所遺境界等者機新若多應火必盛二遭苦二初成上義顯無量二初以別業該同受上言百十是同業者共受一苦今言諸苦即是有諸百十萬億二用此下以此意歷十界界有諸百十萬億華嚴明數極至不可說不可說二今言下對別答彰徧該二初明總答文略意廣上明諸苦實徧十界苦由惑業即顯能脫十界三障廣豈過此二後別答文廣意狹別答七難約觀行解始通三乘今之總答文該十界三聞名二初遭苦聞名共作機由過現惡故遭諸苦復由二世之善而得聞名妙玄云從聞提起改悔心上至等覺皆有善惡相帶為機二聞有下四聞三慧俱能感二初釋相二初別指四教四聞三藏能聞所聞皆是實有通教即空別教即假圓知能所皆是法界聞既有四思修亦然故大本疏解我聞有聞聞聞不聞不聞聞不聞不聞

二若能下正示圓教三慧前三聞慧不得圓聞圓教聞慧四種徧達達四皆是不聞不聞即聞而思何依何著二慧導行一心稱名名圓修慧二此文下結示四稱號二初牒示事理二若用下各示稱念二初事二初明一心有相續一心有數息一心二明稱名今文但稱所歸之名未稱能歸之辭故是略非廣二理二初明一心心有生滅不名為一今達心性非四句生既本不生亦復無滅乃名一心然立一心對他成二若無一無心則無諸無法畢竟得名理一心言達此心者即是體達事中一心二知聲下明稱名既達心空從心所生一切皆空故令聲響能稱所稱皆非生滅故曰理稱事未必理理必具事以此為因安不感聖二明應二初分科二應有下隨釋二初明應相二初判徧圓益相三教作意應不一時間任運應一時普徧二眾機下明機應速相觀音應心內衆生衆生機感心內觀音若不然者不徧不速二皆得下明解脫二初約多機顯圓應故前釋人數云此舉

眾境機多以顯觀深應大二或時下約三速再
貼文經云觀世音菩薩即時觀其音聲皆得
解脫如何觀之能令眾苦皆解脫說聽之
者宜善思之三問十下料簡二初明十界機
應俱時徧二初以多機差別難二答譬下以
四事圓善答五初以四喻示二菩薩下約四
法合三安樂下引此經證智慧寶藏證財智
二四又如下又三喻顯五又是下示三昧力
中道為王統攝二諦一心圓入十益普觀
音入此三昧即是徧入一切眾生心性常以
三昧之力與其十番之益但由機感親疎致
使利益深淺王三昧在妙玄第四十益在第十
六二問一下明一心事理立能感二初久稱
無効問二散心乖法答若能一心稱於事理
其猶形對影生聲騰響答第二別答二初分
科敘意二初分科二敘意二初敘他師意三
初立三機三初有人下定三業前後二通論
下論三機與拔免難是除果離毒是除因得
子是與樂三敘三番料揀三初問那忽與樂
者古以得子為樂故也答云少分與樂不礙

悲門二問禮拜乞子示求樂果何不令求戒
善等業為樂因邪答樂果稱意可引人求修
因勤苦非引接法其文在後者十九說法廣
示修因也三問并答可見二有人下立七難
二初明雙隻鬼開去來者去謂飄墮其國來
謂到此惱人王論輕重者被害則重檢繫則
輕體則是五開則成七二明次第鬼王相問
者三鬼國難四臨害難五來惱難六枷鎖難
三四相比鬼難在海國則重王難在城邑似
輕四五相比王難或死故重鬼惱或不死故
輕各論輕重故云相似乃相問也三有師下
立八難二初一師立二一師破二今明下明
今師意二初明三機二初斥他非二初斥情
下聖應二今不下斥悲門與樂二今言下明
今意二初隨世立次此娑婆國聲為佛事口
機為初意根冥密起必先身身業顯顯後心
而動三業之次豈不然乎二若尋下聖應無
謀且隨世俗立次如前據聖無謀即扣即應
二他既下明七難二初明次第二初且一往
立次從重至輕一往次第二至如下誠不可

定執二問諸下明所表二初以難多唯七責
二答此下以七難表六答二初正示表意二
初通明七六經明七難不止在事故約觀釋
通巨三乘若無所表不能該深故約七難以
表六種外水火風表內三種刀鎖堅礙表內
地種王等有情可表識種大千世界雖非正
難是難所依可表內空二云何下別示空識
二初明表相二空為下明為難二初空雖非
正難而是難由若論觀行亦為所觀二識識
起會見必該通別二種愛見二所以下結示
唯七意二一火下依義釋文三初口機二初
明七難七初火難二初科意三初節經文二
上總下敘經意三釋諸下列義門二貼文下
隨釋三初貼文四初持名二初釋文義二初
釋持名秉持屬口者大論云出入息是身行
覺觀是口行受為心行秉持之心既是覺觀
故屬口業二釋若有挑字去聲不定貌也二
餘皆下明先後二初敘古謂是互出其義不
然二今釋三初約義釋二如慈下引事勸二
初引事證此是男子名慈童女前新養母督

於孝誠後欲涉海母抱其足不欲兒去違母
擊身絕母一髮海上失伴入諸寶城多歲受
樂行孝報也後入鐵城火輪著頂絕髮之報
若專行孝不遭火輪二行人下勸憶持三火
難下約重結二遭苦三應四威神下結二次
約下舉事二初示二人著傳二其傳下舉四
人免難三就觀下觀釋三初通標列報是事
火眼見身覺業與煩惱但有燒義令世善業
及三觀壞故名爲火是以稱爲就觀行釋問
三觀所對唯在煩惱縱兼遠障只至於業事
相火等全不妨觀何得果報預觀釋邪答經
列七難止在人中智者深窮救難之功在王
三昧即二十五有真常我性觀音證已乃能
徧拔衆生之苦於一一有十番破障令與我
性究竟冥一方盡大士拔苦之用然十番破
不出三障若盡理說於一一番皆破三障今
欲易解從增勝說報且在事業屬有漏唯惑
至極觀音修習王三昧時具有弘誓拔於法
界三障之苦故今衆生三障苦逼一心稱名
皆得解脫其義若此豈得不論果報火等應

知吾祖說觀世音圓修三昧圓發僧那圓入
法門圓寂諸難意令行人做之修入所列三
障豈獨即今修觀之境亦是將來所拔之苦
故知具示七難深正論觀行始末之相也
二果報下示分劑報業煩惱始自博地終至
等覺皆具此三故輔行明分段土至實報土
各有三道分段三道謂見思惑爲煩惱道煩
惱潤業名爲業道惑界内生名爲苦道方便
三道謂塵沙惑爲煩惱道以無漏業名爲業
道變易生死名爲苦道實報三道謂無明惑
爲煩惱道非漏非無漏業爲業道彼土變易
名爲苦道今從增勝而說故約事火而爲果
報只至初禪輪迴之因以爲業火故至有頂
三觀所破方名煩惱故通三乘下去諸難其
意准此三果報火難下隨次釋三初果報火
二初遭難三初通明處二如阿下列示相三
凡一下總結數四趣四洲六天初禪若加梵
王合云十六同在初禪且云十五二持是下
感應二初機成獲脫二直就下指數斤局直
就果報地上清涼驗於舊解所失者衆因華

已去九番破有他不聞名二次明下惡業火
二初遭難二初明修因上之所明於現報上
求免苦厄安其果身今所論者修行戒善及
八地定求於未來人天樂果二多爲下明遭
火三初釋相宿習破戒十惡業等於修持時
起作障難使戒定等善業不成名爲被燒有
頂等者然有漏善極非想定非惡業火無所
有下即爲惡業且欲示於惡通三界故引之
耳二術婆下引證二初引事術婆伽姪欲熾
盛火起燒身此即業火能生事火驗三種火
其性不別二金光下引經三能破下被燒上
升之善既爲所焚乃隨惡業牽墮於下二若
能下感應三初成機得脫二故請下引清伏
證梵行者淨行也謂大小諸戒是三乘之人
清淨之行十惡是能破梵行是所破三由斯
下用此文結三煩惱火二初就機應解釋二
初明偏圓機感二初別釋二初約聲聞廣示
見思之因分段之果四心流動三相遷移名
爲火宅竟共推排爭出此宅若非一心稱觀
世音或當墮落爲火所燒此教觀音身在此

岸度人彼岸故令聲聞得二涅槃二次明下
例餘位俱機劑於通教見思為火別教正以
塵沙為火圓教初後無明為火之二土通
名變易未能伏斷無明惑者名鈍根人若能
伏斷稱利根人伏在方便斷窮實報二凡有
下總示二初修觀被燒唯除求離果報火者
戒善已上皆名修道故云九番並為五住惑
火燒者修因禪定亦被受惑三住所燒況三
毒業見思通攝二稱觀下稱名得脫各依本
法而修一心及以稱號若成機者無不得脫
二問苦下明漸頓慈悲二初問起如上所明
二十五有三障苦難十番令脫未知大士修
何方便證何法門得如是力二答苦下釋出
二初略示二所以廣釋二初明漸次二初
修觀本誓三初果報慈悲既於元始發菩提
心凡口見聞終期濟拔二受持下修因慈悲
略云禁戒須兼根本十二門禪以其業火皆
能壞故三修無下無漏慈悲二初事定若據
根本味禪之外有根本淨禪謂六妙門十六
持勝通明禪此等亦帶無漏能滅煩惱今但

從觀骨光等為無漏者蓋取出世事禪之中
有火名者辯其觀相此乃以事禪之火滅見
思之火然事禪有四即觀練熏修觀謂九想
八背捨八勝處十一切處練謂九次第定熏
謂師子奮迅三昧修謂超越三昧今於四中
但舉觀禪中三不引八背者以八背中無火
名故蓋隨便也初云白骨流先者即九想中
於第八白骨修八色流光言八色者見地色
如黃白淨潔之地見水色如深淵清澄之水
見火色如無煙清淨之火見風色如無塵迫
爭之風見青色如金精山見黃色如菩提華
見赤色如春朝霞見白色如珂貝雪見色分
明而無質礙八勝處者一內有色相外觀色
少二內有色相外觀色多三內無色相內觀
色少四內無色相外觀色多此四句未皆云
若好若醜是名勝知勝見五地勝處六水勝
處七火勝處八風勝處此於緣中轉變自在
觀心淳熟勝前八色故也十一切處者一青
一切處二黃一切處三赤一切處四白一切
處五地一切處六水一切處七火一切處八

風一切處九空一切處十識一切處此於所
觀普徧即觀禪成就也二又觀下三觀諸火
者報業煩惱及事定中火皆是三觀所觀境
也此境緣生故先即空次假後中故成別觀
節節慈悲誓拔報業及三惑火二今住下熏
心起應二初乘誓赴難三初真慈悲妙力即是
鄰極同體慈悲冥熏眾生令成機感垂應拔
苦二若事下眾機關誓眾生若起三種火時
與本菩薩所起無殊故關分果之悲以答因
中之誓肇師云發僧那於始心終大悲以赴
難三若眾下一時普救別教雖則修有次第
證必圓融故十種機能一時應二如華下引
經證成二初引經問今家判華嚴善財未見
彌勒文殊已前皆是別教歷別法門今文既
云此火山者名為無盡法門若入此門能知
諸法此門豈非圓融義邪答此唯於火法門
中能知諸法不能於餘法門知諸法故以彼
經云我唯知此一法門故知仍是教道之說
若爾此之三昧住何諦理破何等惑答既云
無盡法門又云能知諸法即是中道三昧破

無明感故釋蓋明善財若於知識得實相三昧則破障中微細無明多分並約教道不融破無明感釋上皆二舉彼下結示觀音若是別教救於煩惱火者即如方便婆羅門所修之相也十番利益者乃是通結前來三番慈

悲二次明下明圓頓二初明本修圓觀慈悲初心觀火不思議境即一火門具三千法雖皆互徧相相分明即於此境發菩提心誓拔衆生三障火難誓與衆生三種火樂二若法下明入位法界機應二初釋三初無謀而應

圓修圓證以圓誓願熏圓力用不動一心救十火難二雖無下不分而分圓普之悲徹底而拔實非前後淺深應之但就機感三障分齊對二十五王三昧力自成多少免果報火當於十五王三昧力修有漏善免惡業火光

二十四王三昧力關何一邪若除惡業不用非想若成善因不用地獄以地獄因無成就故非想之因無破除故修因惡業極上極下互論不用一三昧也二乘已去至圓入中節節皆用二十五有五王三昧力三雖應下入

而不入雖入諸有三障之火以其體了即空假中故無相可得何有能燒及所燒邪二菩薩下結二常途下示已他得失如幻三昧破間浮有具論十番他師唯知果報一益故云少分二水難二初列義門二貼文下隨門釋

三初貼文二初科經二問何下釋義三初遭水二初問二答二初就水難答二火難下對火難答二稱名三水論下蒙應二引證三觀釋二初列三水從增勝意同前火難二如地下釋三水三初果報二初遭難二是時下機

應二次惡下惡業二初遭難放捨浮囊等者大經云如人帶持浮囊欲度大海有一羅刹乞此浮囊初則全乞其人不與次乞其半次乞三分之一次乞手許後乞微塵許其人念言若與塵許氣當漸出何由度海故悉不

與護持禁戒亦復如是常有煩惱羅刹令人破戒若破根本如全與破僧殘如半與破捨墮如與三分之一破波夜提如與手許破突吉羅如與塵許所破雖少若不發露則不能度生死彼岸菩薩護持重禁及突吉羅等無

差別今明惡業故言放捨二若能下機應三煩惱二初明機二初論惑水二初通明諸有水菩薩香象足雖到底若未達岸寧免被飄緣覺觀集而為初門故云愛水增長諸有二二乘下別示四教機二初示聲聞二次支下

例諸位支佛修行不立分果深觀緣起久種三多福慧既隆預侵二習雖未發真四流莫動名得淺處頓證極果名到彼岸通教菩薩正盡得淺習盡到岸變易二土同以別惑而為中流上品寂光方為彼岸二復次下示四

流常途四流只是界內之惑今取別惑方名無明故知即與五住無異但合色愛及無色愛為一有流耳二菩薩下明應前之十番各有修相皆所被機未脫之事今說本觀二種修相皆是觀音垂應之本二初通示二觀慈

悲兼別觀者略有二意一者此教初心立行雖依漸次以知中實後心能證王三昧故二者欲以歷別之相顯於圓融一念具故摩訶止觀十乘之初先明次第顯不次故今釋此品本觀皆兩有益二意二所以下別明三昧

漸頓二初漸二初漸修元始發心上求下化水光三昧即觀白骨八色流光中一色也水勝處等例如火難中說二今成下頓應二初乘誓赴難漸修頓證常鑑法界十番機緣三障水漂對於因中即即誓願令彼一切皆得解脫二如華下引經證成二初證託於事海觀三障海十二年者十二緣也漸漸轉深見海十德十觀成也生大蓮華顯妙境也天龍莊嚴者具妙力用也有佛相好常見盧舍那也申右手者權智應也摩我頂者實智感也即以感應道交彰始本分合也說音眼經者分得果法也一日所受至不能得盡者一念心塵顯大千經卷也二當知下結既如阿字具一切義應知亦是中道法門但帶教道唯知此一耳二復次下頓二初頓修十界趣水者水為法界攝諸法盡故言趣也既立能趣及以所趣故當俗諦水尚等者所趣之水全體是性無相可得無所趣故那有能趣能所俱空名為真諦云何等者水尚巨得則無有趣有趣既絕不趣自忘即以雙非顯於中道此

之三諦同一法性即一而三即三而一不思議諦也二如此下頓應二初明不應而應大經云慈若有無非有非無名如來慈豈非三諦起慈悲邪前總難中十界眾生受苦稱名菩薩即時觀其音聲皆得解脫不觀十界即空假中那得一時離於眾苦良以三諦是生本性亦聖果源無有二體故同體悲方能圓拔二明不分而分大意同前火難中說今以四流對諸位難四教入空離於有流等於見欲二流也假於有流無染濕者假雖破空亦不著有以雙流故應知假顯空亦彌著名平等觀義在於斯中破無明如常所說

觀音義疏記卷第一

卷九

七

觀音義疏記卷第一

校勘記

- 一 底本，明永樂北藏本。
- 一 六四一頁上二行迷者，**南**作「四

明沙門知禮述」，以下各卷同。

六四三頁上一九行第四字「經」，**南**作「疏」。

六四四頁中一〇行「四五相比王難或死故重鬼惱或不死」，**南**作「五六相比鬼惱或死故重王但禁固」。

六四五頁中二行「圓寂」，**南**、**徑**、**清**作「圓救」。

六四七頁上三行「若是」，**南**作「若示」。

六四七頁上七行第一〇字「一」，**徑**作「二」。

六四七頁上一五行末字「光」，**南**、**徑**、**清**作「當」。

六四七頁上一六行第八字「關」，**南**作「闕」。

六四八頁中卷末書名，**清**無（未換卷）。

觀音義疏記卷第二

遵十

宋四明沙門知禮述

三羅刹難二初列義門二隨門釋三初貼文
 二初科經二人數下隨釋二初明難五初舉
 數二初釋人數若百若千或萬或億以其泛
 海必乘大船故云結伴不可獨往二賢愚下
 明入海二次遭下難由三初正釋難由二初
 證風非證難以古師足風為八難故據結文
 但成鬼難二難由下推風是難由若展轉推
 之皆是難由於諸由中風由最切是故經文
 特言風耳二七寶下追釋寶物二初分真偽
 二示似真三黑風下更釋風相二初他解三
 初舊師立二有人下他人彈三今還下今例
 難二請觀下今釋二初經明風色二風加下
 風黑怖甚三羅刹下遭苦羅刹鬼者本毗沙
 門天王所管有其二部一曰夜叉捷疾鬼也
 二曰羅刹食人鬼也徧在諸處然其本居海
 外有國或人飄往其國或鬼來此惱人皆由
 惡因相關故也四一人下明機五明應二何
 意下結名二約事三觀釋二初明風義不局

世界中風果報風也黑業各風至夫人道善
 寶皆惡業風也夫無漏財煩惱風也以下第
 五又明鬼難具明三障惡鬼之義故今觀行
 且從難由風義而示欲於六種明別圓觀即
 是一切觀境之式二從地下釋風通三障三

初果報二初遭苦二初上至三擇二如僧下
 下徧諸趣僧護比丘明四阿舍為衆知識五
 百商人入海採寶來就世尊請此比丘船中
 說法佛知有益許之今去船還海岸登陸而
 行夜宿樹下商人早發忘喚比丘因茲失伴
 獨行山林見僧伽藍比丘住處若飲食若房
 舍若溫室若園林若田地若受用皆是苦具
 日夜之間受種種苦有百餘條僧護問故皆
 答云當還問佛自當知之既至佛所具陳所
 見佛皆答之悉是比丘破諸禁戒毀壞常住
 侵用衆物於彼海山受地獄苦學者覽之足
 以自誠二當此下明機應二次明下惡業二
 初遭難三塗約果愛見約因皆由宿業今起
 愛見隨於三塗貪欲之心如羅刹婦破戒定
 善如隨食子夫人天報如食其夫二急須下

機應三次明下煩惱二初明機二初聲聞聖
 財不出七種一聞二信三戒四定五進六捨
 七慚愧慧行即無常折觀行行即不淨慈心
 等二行約凡位所修七財約聖位所得二次
 明下諸位八倒風者支佛六度通別圓入空
 之觀以常等為倒假中變易以無常等為倒
 用正觀一心稱觀世音即出二邊惡鬼境界
 即能達到中道寶渚鬼義合前後章前即此
 章貼文約事後即第五鬼難章也二法界下
 明應二初通示二觀慈悲別雖漸修果能圓

應二菩薩下別明三昧漸頓二初漸二初修
 時逐行起誓二今入下明證時隨難相關二
 若作下頓二初修時三諦圓融風字門者如
 請觀音疏釋六字章句以六道等為六字門
 良由六道體是法界能通實相故名為門今
 以風字為門其義亦爾字者召法之辭二若
 分下用時一念差別四刀杖難二初列門二
 解釋三初貼文二初科經二釋義三初遭難
 二稱名三今言下蒙應二初據文消釋二問
 下對前料簡二初問二答二約證三觀行二

初通示三障二從地下別釋三相三初果報
二初明遭難婆伽龍王本宮安住興雲降雨
六天四域修羅龍鬼感見不同天見華實人
得清水修見刀劍二若能下明機應二次明
下惡業二初遭難惡業所感三毒熾然近障
戒定遠妨三觀言思絕處即微妙心二起怖
下機應三次明下煩惱二初機二初聲聞二
初遭苦二初釋相二故大下引證彼經云譬
如有王以四毒蛇感之一篋令人養飽瞻視
卧起若令一蛇生嗔恚者我當準法我之都
市其人聞已捨篋逃走王時復遣五旃陀羅
拔刀隨之密遣一人詐為親友而語之言汝
可來還其人不信投一聚落都不見人求物
不得即便坐地聞空中聲今夜當有六大賊
來其人惶怖復捨之去乃至路值一河截流
而去云云合云蛇若害人不墮惡道云云字力
必為五陰旃陀羅害若不識愛為親親觀
於六入猶如空聚群賊住於六塵六入欲捨
復值煩惱駛流應以道品船抵運手動足過
分段河十住未免唯佛究竟經文本喻三乘

始終今喻聲聞觀法十二因緣關禁如城黑
白不動三種之業繫屬如館五欲為害如拔
刀人魔境難出如門被守二爾時下得脫二
次明下諸位各以本觀一心稱名即時解脫
二復次下應二初漸二初明本誓隨見隨修
皆起誓願拔於眾生三障刀杖二今住下明
赴機三初赴機相三昧神力稱本諸誓一一
能拔二刀杖下所住法以七種難表內六種
對於觀門此地種門今修成也三如華下引
經證六種徧收一切觀境刀杖堅礙屬地字
門故引屋壁地種能現諸佛及能發明善財
定慧一切功德當知地門能成普應二復次
下頓二初圓修地為法界生佛依正無不趣
入地字法門當知一塵無不具足三諦等者
一塵即空一切皆空假中亦爾二圓起下頓
應二初總示三諦慈悲無不徧攝故能一時
徧拔眾苦二若欲下分別圓悲該亘不可別
論若欲易知對機分別四洲四趣四王切利
此之十有有事刀杖能感一十王三昧力修
有漏善遮惡刀杖感二十四王三昧力四教

三觀一心稱名感二十五三昧之力第五鬼
難二初列門二貼文下隨釋三初貼文二初
糾經二三千下釋義四初標處二初大千假
設二對上料揀二遭難三稱名四鬼所下蒙
應恩威即是折攝二門以恩攝故害心惡眼
二俱休歇以威折故惡害亦然二約事標而
不釋合注云云上羅刹難已彰其事故不重
說三觀解三初果報二初明難諸天等者嗔
增諸惡助鬼之威慈為善本消鬼之勢行者
當知若多嗔恚常與惡鬼同其事業若常慈
悲與佛菩薩同其出處二如是下明感二次
明下明惡業二初明難二初鬼動三毒雖是
惡鬼使人姪佚亦是姪業所召以其多起姪
惡致令姪鬼得便嗔恚邪見亦復如是又是
宿業互相招集故於今日同造惡因破於善
業二三毒下諸惡名鬼如前業火業水業風
故今諸惡得名為鬼皆以三毒而名惡業與
煩惱何異任運起者名為煩惱卒起決定能
動身口名三毒業今既能破五戒十善必非
任運貪嗔癡也人天散善名為動業四禪四

定名不動業二若能下明感三次明下煩惱
二初機二初明難二初所遭難二初明滿大
千男性剛利如見推劃女性柔淨如愛纏綿
二何以下徧三界二此鬼下遭難人小草已
上八番行人俱為煩惱鬼之所害二若稱下
明感見愛塵勞即染而淨是故淨名取譬侍
者隨意所轉二次明下明應二初漸二初隨
修立願如訖拏迦等即請觀音經緣起也毗
舍離此翻廣嚴彼國人民遇大惡病眼赤如
血兩耳出膿乃至六識閉塞猶如醉人有五
夜又名訖拏迦羅吸入精氣二於諸下乘普
普救三初示相漸修頓證法身自在法界衆
生三障鬼難關於本誓一一救之能令諸鬼
皆為佛乘二如華下引經斯是菩薩住鬼法
門能以鬼身廣作佛事三障之鬼或破或用
得自在故一切鬼難一時普救三故知下結
益二若圓下頌二初明圓觀慈悲識種乃通
今約鬼修別從愛見識種為境一識一切識
一切識一識非一非一切而一而一切此是
鬼門十界三諦依此妙境真正發心乃能徧

應二若分下明隨機分別事鬼既能惱於帝
釋故地居天四洲四趣感於十種王三昧力
餘義同前六枷鎖難二初列門二隨釋三初貼
文二初節經二上臨下釋義四初標罪二在
手下遭難三鳥死下稱名曾子云鳥之將死
其鳴也哀人之將死其言也善四蒙應二約
事三觀釋二初正明枷鎖三初果報二初明
難事繫唯在四趣三洲二若能下明感二次
明下惡業三初明難二若欲下明感三故經
下引經廷尉檢繫可有散時妻子錢財繫無
脫日望現在等者只今妻子及錢財等亦業
亦報何者若從現說名之為報從過去說名
之為業應知障善皆是宿惡此之宿惡或已
成報乃附報為障即今妻子及自身依報等
也若未成報今在業道亦自有力今善不成
又今妻等不定為障若於往世同營善因今
則能為修道助緣如妙莊嚴王因妻子故見
佛悟道現見有人妻子勸善畜財能施今從
惡因所感妻等名鎖名獄若歸觀音則成報
之業及未成者是惡皆息三次明下煩惱二

初明機二初約聲聞二初約小釋二初明難
凡夫見思全在初二三果思惑未盡皆名有
罪羅漢思盡名為無罪大品經指學無學名
為大龍故云摩訶那伽學人殘思名為有罪
無學斷盡名無罪俱未無餘名同在獄既有
果身寧逃五陰及以三相乃名檢繫權實等
者此約有罪示也礙於二智提拔名枉妨於
二行進趣名械小以斷常為中道枷能障五
分為法身鎖只是見思對於所障得枉等名
二稱名下明感二此復下明通大若就通感
論枉械等即藏通入若就別感明枉械等即
別圓人二次明下例諸位二若論下明應因
中漸頓慈悲果上圓普與拔皆如上說二若
三下兼明空識二初普應指前二論其下本
觀今說二初漸二初本觀慈悲二初隨觀示
一切煩惱是識所為識最是難空雖非難能
來難故空亦名難空為業者亦是業由身內
有空故能動作造於業因外空亦然空為感
者於境迷悟成障成理一切法邪一切法正
而於即即起善與拔二故淨下引經證入不

二法門品明相菩薩曰四種異空種異為二
 四種性即是空種性如前際後際空故中際
 亦空若能如是知諸種性者是為入不二法
 門既云四種性即是空種性就性明空是
 中理此以中理不於事二彼約五種即性故
 不二今明六種豈不即性得經意故加於識
 種彌顯不二若其空識不即中道將何以為
 王三昧體二成王下乘普應赴二初示相二
 華嚴下引證見空實相能於虛空立種種事
 利諸衆生二若作下頓二初空識圓修諸門
 觀法多推心識從近從要初心易故人根不
 等有宜觀外而得益者四念處中下界衆生
 多著於外故令攝境觀於內心上界衆生多
 著內心故令觀色奪於內著今觀空種亦是
 色類唯是一色空外無法故一切十界悉趣
 空門空即三諦故一切法皆即三諦三諦慈
 悲無生不攝二起無下慈悲普應第七怨賊
 難二初列門二貼文下隨釋三初貼文二初
 正釋怨賊二初科經二難處下釋義四初標
 難處二初明處二次明下明難二初釋滿中

二怨者下釋怨賊二二標下遭難人二初示
 四義二商者下釋四義四初釋商主二既有
 下釋商人三既涉遠下釋重寶以人衆路遠
 顯所膏寶貴四險路下釋險路以處以人二
 事釋險三機者下明有機二初示經四義二
 所以下通釋四義二初明前三助進二初釋
 二初明設三所以一心稱名為計策者更無
 過此知德可憑其膽則定二若不下明無三
 不進二故知下結二三義下明後一能感二
 初明因三故唱二南無下翻梵就華四明蒙
 應二次結下寄結口機二初舉經二今言下
 釋意二初約威力明二巍巍下約字義顯二
 約事證三觀釋三初果報二修善下惡業修
 善治惡若惡多善少惡即怨賊若善多惡少
 惡為僕從冰炭之勢多能滅少繫念成機惡
 銷善立三次明下煩惱二初略明機二初通
 明四行遭賊以前六徧備明八番破惑感應
 故今怨賊但明四行遭煩惱賊將歷四教自
 攝八番言四行者一戒法受持二聽習教理
 三研修正觀四正助合行出世行人要先票

戒隨境護持持心習教憑教顯理稱理修觀
 以正導助若非此四入聖何期初商主下戒
 中三句明受一句明持五塵能殺持護之心
 名戒怨賊次或法下聽法中師徒說聽皆欲
 依教而顯至理此二俱得名重寶者以其詮
 旨得則俱得失則俱失其猶識指方乃見月
 故知解教誠為不易何況理乎而其徒主兩
 喜雜魔二寶俱失師為利故說徒為名故學
 斯之兩人皆成魔業或師嗔弟子或弟子恨
 師亦是二人值於魔事或心下修觀中心王
 若正心數亦正王數同求正智之寶三毒覺
 觀能劫此寶最為怨賊或般下正助中正觀
 般若導五助行共顯理寶般若如知金藏五
 度如用功掘出六敵之賊害此二因還今藏
 隱是名怨賊二將此下歷諸教明感四教行
 人一須四若遇怨賊一心稱名四行皆就
 二例明應倒前六種故略不說第二意業機二
 初列門二貼文下隨釋二初貼文二初科經
 二釋義二初正明意機二初總示經文二通
 稱下通釋經義三初依經論釋三毒二初通

釋二初明單複云貪瞋癡此三單也今從複列故云姪欲瞋恚愚癡大本疏云自愛為欲愛他為姪自忿為恚忿他為瞋自惑為愚惑他為癡二有人下明多少二初他明少二意謂下今明多二初立少年經二今明下明多能感毒之多少由習重輕求之進不由機有無無機者毒多毒少俱不求離若其有機毒之多少俱能求離古人不解執多不求今明能念任多亦離二大論下別釋二初正別釋三初貪欲四初大論明宿因意同此經謗經之罪歷諸惡道縱得人身姪欲熾盛不擇禽獸若不求離復淪苦趣無解脫期二不擇下現事明過患術婆伽略如玄記癡奴者癡國之女也周幽王伐褒姒人以奴獻之王甚惑之初幽王與諸侯約有冠即擊鼓舉烽諸侯來赴及惑褒姒褒姒無笑王欲其笑乃擊鼓舉烽諸侯皆至而無冠奴乃笑又好聞裂繒之聲發繒裂之以適其意及申侯與犬戎兵至擊鼓舉烽諸侯以為如前見欺無復至者遂敗三淨住下二經明蟲鬼各是有情以

共業故資人倒惑又阿含云姪亦有鬼鬼入心則使姪伏無度四如大下大經明多少習果若成報果在即故云熱也如人災至合當王惡即有惡人獎助為惡蟲鬼如助者地獄如王惡此多欲相也若反此者名為少相二瞋恚四初約喻明瞋相二故遺下二經明障道惑是一切善法根本瞋既乖慈名劫名障百法明門者即障別圓地住所證之法也仁王云初地得百法明門二地得千法等地論云入百法明門增長智慧思惟種種法門義故百法者應如百法論所明三大集下二經明魔業佛以慈定能伏天魔是知瞋心為魔所降習近瞋恚是報熱時四若例下例上有蟲鬼若蟲鬼潛伏是瞋少相三愚癡二初明過患三句明於邪癡之相如大經者合云習近愚癡是報熱時此乃邪癡習報二果癡心習成地獄報熱也二例前下例蟲鬼多少隨人二三毒下總結過二欲離下約伏斷明得離三初示念得離二有人下非顯正二初他解非滅離以由他師不解常念致令三毒

不得滅離二今謂下二經明盡淨經直言離那事伏釋若以念故唯能伏者繫念六字能淨毒根至成佛道亦只伏邪三今作下正明伏斷果報修因三藏菩薩此三伏惑聲聞緣覺通別圓善薩方便土人實報土人此七斷惑三問離下約問答明常念二初約念非離或難二答經下約念即智慧釋二初略明正念之德二初即念明慧之功念想觀智等諸名宇有過有德有偏有圓須約六句定其法體故圓中念破偏小智圓中之智破偏小念偏小之念修圓中智偏小之智修圓中念圓中之念即圓中智圓中之智即圓中念以此六句評法是非方解一切經論名相問家昧此故使非念而是於智今此圖文既云常念顯非二邊有生滅念雙遮雙照中正之念也體煩惱性是觀音身不破煩惱不立觀音破立既忘能所斯絕是為常念恭敬觀音不離三毒而離三毒若有觀音可生緣念若見三毒須滅離者此乃增毒非離毒也二若如下離念說慧之過二今此下委明修觀之相二

初忘照各論四句此之正念深體既絕忘照不妨即照三諦即忘三觀雖約四句唯忘三觀以雙非雙亦只是中故不以色念忘俗也以色例於一切諸法不以非色念忘真也合云不以非色非非色念忘雙遮中也不以亦色亦非色念忘雙照中也約照三諦復成四句亦以色念照俗也亦以非色念照真也亦以非色非非色念照雙遮中也亦以亦色亦非色念照雙照中也應知善忘假者方善照假善忘空者方善照空善忘雙非方照雙非善忘雙亦方照雙亦不須以空忘假以假忘空雙非雙亦皆悉爾也此就圓論念即法界無德不備故作四句說之自在終日忘四終日照四如此方是常念觀音二感次下漸頓有諸四句次第非念忘四句也次第論念照四句也忘照本求離於三毒故次第離亦有四句若得別教三觀之意諸句可見何者如照空時必須忘空以遺著故忘照成者必離見思故此空觀有忘有照有離次觀假後觀中皆須論於忘照離三若不次第忘照及離

斯是圓觀如向四句二次就下觀釋二初前七番指上果報已上至通善薩皆不能破無作之集別人雖破而在後心今從初心故同前指二今但下後三番當說二初三毒逆順委示二初約界外雙標二今取下依法相廣釋二初逆順各示二初順約煩惱釋初明毒害二初二乘三毒二初明毒相二初合明三毒二開三下開成八萬既有三毒須論等分四分各具二萬一千是故成於八萬四千界內既爾界外亦然何者以大乘說諸法不滅云斷惑者但轉有漏而成無漏入假入中八萬四千隨觀而轉至果乃名八萬四千波羅蜜也二淨名下引經證觀衆生品天女以天華散諸菩薩大弟子上華至諸菩薩即皆墮落至大弟子便著不墮一切弟子神力去華不能令去爾時天女問舍利弗何故去華答曰此華不如法是以去之天曰勿謂此華為不如法所以者何是華無所分別仁者自生分別想耳乃至云結習未盡華著身耳結習盡者華不著也被疏解云華至菩薩皆墮落

者表善薩信不思議解脫生實報土已離別惑彼妙五欲所不能動故華不著身皆自墮落至大弟子便著不墮者二乘但斷界內五欲故世間五欲所不能動別惑未除故為界外上妙色聲之所染汙故訶言結習未盡華則著身下文料簡云結習未盡華則著身何開別惑答大論云於聲聞經說為習氣於摩訶衍說為正使即是別惑二未斷下菩薩三毒同有此三毒者望前二乘名同義異前但貪空今貪俗中前瞋生死今瞋涅槃前不達真即是中道為癡今見中道未得了了為癡如大樹折枝之譬者大論三十一云譬如空澤有樹名奢摩黎枝觚廣大衆鳥集宿一鴿後至住一枝上枝觚即時為之而折澤神問其故樹神答云此鳥從我怨家樹來食彼尼俱類樹子來棲我上或當放糞子墮地者惡樹復生為害必大是故懷憂寧折一枝所全者大彼喻善薩畏於二乘壞滅佛乘心也二欲除下明機應二初明正念機應二永離下明上土全分生身善薩若未得入別圓地住生

方便土故於變易論全未離無明之惑若在
生身入地住者即生實報故於變易除殘別
惑一變易土分於方便實報異者只由生身
於無明惑有侵未侵不同故也二次明下逆
約法門釋以煩惱各立觀法稱不順常塗故
云逆說然若不知性惡之義云何三毒而為
三觀於中二初明毒觀欲成二初明凡小毒
少法略於癡人略菩薩癡隨貪患亦名為少
菩薩偏假三毒非多二菩薩下示圓人毒多
二初就毒名論大語稍同前意則永異前在
二諦偏論取捨是可離法今就三諦說貪瞋
癡是究竟道理性之毒莫不徧周故皆名大
五不受者謂受亦不受不受亦不受亦不受
不受亦不受非受非不受亦不受不受亦不
受皆言不受者即無生觀蕩於取著也前四
即離四句也後一謂觀亦自亡也故大品第
三身子問須菩提何故不受答云般若波羅
蜜空故自性不受無明下明癡毒須論即性
異前唯修又癡下明癡等若非即性豈皆如
空不可盡邪二如此下約法門明妙三初標

列三門理性之法德過一際或稱毒害或稱
功用今明三毒是三法門則佛菩薩無不修
證二大慈下解釋三相圓觀見思三毒之境
即三法門攝一切德三初大貪法門大慈大
悲者諸佛以無緣慈悲普熏三業於十方世
界普現色身而作佛事慈悲之名雖同四無
量中而體水異四攝一布施攝二愛語攝三
利行攝四同事攝衆生情所愛者即是此之
四法以四接引導以正道而度脫之十力者
一是處非處力二業力三定力四根力五欲
力六性力七至處道力八宿命力九天眼力
十漏盡力無畏者即四無所畏一切智無
所畏二漏盡無所畏三說障道無所畏四說
盡苦道無所畏於八衆中廣說自他智斷既
決定無失則無微致恐懼之相故稱無所畏
三昧即百八三昧解釋蓋如法界次第也二
大瞋門般若即三般若四邊不可取者觀照
般若即寂而照不可以有取也方便般若即
照而寂不可以空取也實相般若非寂非照
不可以雙亦取也而寂而照不可以雙非取

也迦毗羅城如玄記三大癡法門前取捨二
門雖具中道而取門終以立法為宗捨門終
以蕩相為主今兩捨門豈不具於二邊而終
以雙非為體不三而三三門宛然三而不三
門門絕妙初約無緣直示二舉鑑像難思三
引淨名杜口三引人證結諸法無行經云諸
天子白佛言世尊文殊師利名為無礙尸利
上尸利無上尸利文殊語諸天子言止止諸
天子汝等勿取相分別我不見諸法是上中
下如汝所說文殊義者我是貪欲尸利瞋恚
尸利愚癡尸利是故我名文殊師利乃至云
我是凡夫從貪欲起從瞋恚起從愚癡起我
是外道是邪行人諸天子言以何事故自言
我是凡夫等文殊言是貪欲瞋恚愚癡性十
方求不可得我以不住是性中故說我是凡
夫文殊汝云何名外道文殊言我終不到外
道諸道性不可得故我於一切道為外諸天
子言汝云何是邪見行人文殊言我已知一
切法皆是邪虛妄不實是故我是邪行人說
是法時萬天子得無生法忍二欲滿下常念

感應四初明機成德滿二一切下明諸聖所
 依三故無下引無行經證四一切下結成佛
 法二此三下逆順合談二初被物雙示就三
 煩惱常念求離名為順說約三法門常念求
 滿名為逆說滿離俱時但約悉檀去取說耳
 二如華嚴下引經委證三初證貪欲逆順說
 離欲際順也隨類見女逆也欲是煩惱是故
 說離欲是法門是故說住即離即住唯離唯
 住離深住深離極住極今觀世音乃是際極
 住離貪欲故一切機求離求住皆須常念二
 又四下證瞋恚逆順以調一切順也若楚治
 罪逆也恚害煩惱是故須調瞋恚法門是故
 須行逆順無二調行不偏例前貪欲其義是
 同但欲是樂法故作實事接物令離恚害是
 苦故以幻事調他令離若其機緣宜以實殺
 而得益者即如仙豫殺婆羅門為瞋法門此
 乃假實互現例於貪癡亦可幻設但得逆順
 相即之意不拘假實也三方便下證愚癡假
 實如前火難具引經文逆順滿離例前二毒
 其義不殊二次此下明二觀慈悲例前大士

本修三毒滿離之觀復見眾生為三毒過之
 所惱害亦見欲滿三毒法門故起慈悲誓令
 眾生離三毒過滿三毒德今成補處鄰極三
 毒故能任運徧法界應普令眾生滿離成就
 然漸頓觀皆觀三毒頓則滿離不二而觀漸
 則初心但觀於離後乃滿離相即而照二結
 意機經文可見

觀音義疏記卷第二

觀音義疏記卷第二

校勘記

- 一 底本，明永樂北藏本。
- 一 六四九頁上一行經名、二行述者，
 [清無(未換卷)]。
- 一 六五〇頁上一〇行第一五字「我」，
 [南、徑、清]作「戮」。
- 一 六五一頁中七行「三觀」，[南]作「二
 觀」。
- 一 六五二頁上一七行「起無下」，[南]
 作「十法下」。
- 一 六五三頁上末行「各是」，[徑]作「各
 自」。
- 一 六五五頁下五行「初約無緣直示」，
 [南]無。
- 一 六五六頁上二行「一切下」，[南]作
 「佛法下」。
- 一 六五六頁上六行第二字「如」，[南]
 無。
- 一 六五六頁中卷末書名，[清]作「觀
 音義疏記卷第一」。

觀音義疏記卷第三

約一

宋四明沙門知禮述

第三身業機應二初列門二貼文下隨釋三初貼文二初分經料簡二初分經二文云下料簡二初獨女求男問二解者下女無子苦答二初他謬解二今解下今正釋二求男下依經解釋二初求願二初大師銷文二初釋求男二初唱經二釋義二初分經三義二願與下略二解一二初略願行二德業下釋德業二釋求女二初唱經二求女下解釋二初明存略意二女人下明相貌意二有人下章安斥謬二初斥非顯是二初叙他謬立宿植德本眾人愛敬此之二句據義猶是女之德業他師謬謂雙釋男女伏疑之文意恐人疑男之智慧女之端正皆由修種忍智之因非聖能與不修而得墮無因過故出彼意云眾人咸謂觀音但能交會父母等也二私難下明今正義二初難破二初立義難福慧受生皆由緣辨觀音既能與其生緣何不能與福慧緣邪二難觀下引文難見不修因聖不能

今有福慧者眾不稱名何故得脫此以現文破無因執不用義解同心乞福也二今明下正立二初釋觀音用徧三千法界於諸眾生得大自在無生緣者令植生緣無福慧者亦能令種此等皆於中陰中作故中陰經云妙覺如來以神足力將於無量四眾八部入中陰中化作七寶講堂七寶座等彼中陰眾生七日至一日終者盡令住壽如來與化佛說法教化令七十八億百千那由他中陰眾生起無上正真道意經說甚廣尚能令彼中陰眾生發菩提心豈不能令植福慧邪二今不下結二結歎二初兩向解釋四句經文雖是結句亦是釋疑則可兩向若宿植德本眾人愛敬兩句經文定屬生女德業句也二問禮下對前料簡二初問二答二引事三觀解二初明果報二初無子苦阿鼻地獄無求子念諸餘輕繫苦樂相間六欲諸天皆有親愛故無子者而生苦惱二禮拜下明機應二明修因有漏無漏一切善法不出定慧即男女義皆須修習並名修因不同諸難別以有漏之

善名為修因二初列章二法門下釋義二初辯法門二初以事表法二初正表法二初表世間法二初明苦集無始至今常為癡愛及根塵識習熏資熏生於惑業無量男女此之眷屬一切眾生莫能捨離二若外下示外書易云乾道成男坤道成女禮云天子之與后猶陰之與陽天子修男教后修女順二若就下表出世法二初表能生父母佛於一切而得自在名為國王尊嚴如父經教合理開發智慧養育如母佛法和合生三乘僧故經云從佛口生從法化生得佛法分又權智歷緣能成果用實智冥理能生果智故一切佛皆由此生初則果能生因次則因能生果共成一義也二又慈下表所生男女淨名云慈悲心為女善心誠實男先機此文立於悲智名為男女冥中道智即是誠實善心故也乃類此法立諸男女初以禪慧對於男女次分三乘以對男女後約佛性見對不見而分男女何者既以見性為丈夫相即彰不見為女人相復約照性自具男女佛性正觀決破無明

為福德智慧之男中道慈悲含覆一切為端
正有相之女二今借下結表意二問那下釋
難明表二初執無妨有難二初立無男女理
二大經下引無男女文二初正引教文二初
引大乘文大經二十八云涅槃無相謂色相
聲相香味觸相生住壞相男相女相是名十
相無如是相故名無相次大論淨名及安樂
行皆列男女二名非之以顯無相若不二門
云無定慧乃是男女所表之法也二小乘下
引小乘文理無相故不可言說無相即非男
女相也空平等故離男女等一切相也二男
女下結無所表能表男女既無所表定慧安
在二答大下即遮而照釋二初廣釋三初說
默相即二初據理妙絕若論絕理尚不可說
無男女相豈可據論有男女耶二善巧下破
機有無若於衆生有四益者或說無男女或
說有男女故引天女不離文字說解脫相性
空即脫何妨文字真無三世俗即有二諦既
即說默無違二非有下明一二本融三初法
中道雙非則無定慧當體雙照定慧究然言

未曾相離者即定慧不離法性也二譬如下
喻豈因左右令一身異豈可一身而廢左右
三合只一覺性有寂照德名為定慧豈此二
德暫離覺性三言定下明定慧互具二初約
義明具三初法一覺靜明名為定慧是故此
二終不孤立二譬上以一身左右譬於二德
不離一性猶恐謂其二德相離故以二人左
右譬之此如修性不二門云二與一性如水
為波二亦無二亦如波水當以彼喻而尋此
喻三定慧下合二何但下據文證釋二初慧
具定男本表慧而兼福德即慧具定也二文
云下定具慧慈心種相者經云清淨慈門利
塵數共生如來一妙相即無緣慈定而修其
相也互具可知二故知下總結二初以一二
相即結此文男女各具二德即表定慧二法
互具若非體一何能互具故以互具顯乎體
一故二不舒卷自在二理實下以說默相
即結理非一二赴緣兩說如此說者何異不
說經示男女其德互具表於定慧一二無異
說默不殊能此解者方得經文表法之義二

次明下與願二初示義門二初明十番感應
四初果報二修因下世善三初五戒二初表
行法二若不下求願滿行人若為五種感業
牽破持心當念未來感報苦樂歸命觀音障
退戒貌二求即滿二十善若例五戒安攝口
四酒即意三並慧屬男若自細作不綺是真
實屬男不兩舌是和愛不惡口是柔善屬女
不貪癡是無滌智慧屬男不瞋是慈屬女餘
同五戒三修禪下八定定即四禪四空各有
修證且論初禪五法為修五支為證修以樂
欲精進巧慧此三方便分別屬男憶念一心
此二方便靜細屬女若證支林三支慧多屬
男二支定多屬女若論二禪四支一內淨二
喜屬男三樂四一心屬女三禪五支一捨二
念三慧屬男四樂五一心屬女四禪四支一
不苦不樂與第四一心屬女二捨三念清淨
屬男若論四空一空處定二識處定三無所
有處定四非有想非無想定此四雖無支林
男女而有微細四陰通以四處受想為女行
識為男若論四無量心慈悲屬女喜捨屬男

今且粗辨備在禪門須者應檢三四教四初三藏三初聲聞二初表行法略舉停心以爲所表念處乃至正道節節應明男女之義以諸道品不出定慧二法故也直緣諸理者即四諦十六行觀也出觀等者歷事之時愍物執常爲說四諦名法緣慈二若不下求願滿出觀男女者法緣即正智之男慈悲即柔和之女既帶空入假則歷事不淡故不畏諸有也二支佛二初表行法緣方便等者即凡地修福種相之時名起慈觀慈觀者即觀十二因緣無常無我發真約頓證之位出觀能用生法二緣之慈譬鹿迴顧者大論譬三獸在獵園求出不同聲聞如麀驚怖跳出都不顧羣緣覺如鹿雖顧財羣怖不停待菩薩如大香象雖遭刀箭擁羣共出二若不下求願滿

法小同三藏唯論菩薩凡亦同前唯於真位以智爲男以慈爲女二求願下願滿三別教二初明男女生相此教外凡爲破見思所修正助作意趣空望中猶名有爲有漏五度福嚴故稱爲女而知地上無作智嚴在今心性乃緣此性通伏無明名之爲男雖緣無作爲偏修空尚達中理故男女相遙若入內凡見思破處心趣假中順於本性名男女交至迴向位正修中觀名懷聖胎證初地時即遮而照慈智合發名爲雙生得念不退無兩邊過

似位無明不覆而覆名曰處胎初住慈智不顯而顯名曰雙生真慈出假愛見莫拘真智趣果無似愛滯亦不畏者同體權實二皆無縛二方便下願滿四變易言兩番者方便實報同名變易乃以二土名爲兩番若實報人斷證雖分四十一品皆是破於障果無明唯求究竟慈智男女故於此土論一番益其方便人根雖利鈍法分漸頓而皆大乘俱求佛智此土唯望實報爲益唯求分真慈智男女是故論益亦只一番二復次下作三差料簡三初明人天定散二初明有善禪之德空居四天因亦修定以散心強故但名男例此四空以定強故合云唯女四禪諸支既對定慧即名男女俱時而得故曰一心二從三下斥無動出之功三界功德雖名定慧而皆愛味或雜邪見都屬有漏是故男女無動出用二從二明藏通智斷二初明有無漏之德二從二下明無中道之夫大經既以見佛性者名爲丈夫故不見性皆名女人無漏諸定不能發生中道之智故如石女二乘偏空名爲定

多菩薩偏假名為慧多此之定慧俱不能見
寂照平等三德之性迦葉菩薩涅槃之前豈
是外道名邪見者蓋未出二邊空中名邪三
唯有下明別圓地住修因雖異證道是同斯
乃性德緣了願為果中定慧二故知下斥他
句第三勸持二初科經二勸持下釋義三初
勸持二格量二初科二格量下釋四初格量
本經舉六十二億恒河沙不多不少者佛頂
首楞嚴云此三千大千世界現住世間諸法
王子有六十二億恒河沙數修法垂範教化
衆生隨順衆生方便智慧各各不同既是現
住娑婆菩薩是故特舉為格量本二問三答
四正格量二初約教釋二初約佛眼略示二
初以少格多二問起答釋二初以人情問二
答佛下約佛眼答佛眼所照攝法界量四多
法界不增四少法界不減故云功德正齊二
問何下對他解廣釋二初問雖示佛眼稱量
不謬其意難明故須問起先引古釋方彰今
義二舊解下答二初叙舊解非五初引物論
等其福實殊者謂六十二億之福實勝觀音

但是方便引物論等此解最謬破意可知二
二云下田有高下對劣顯勝不見觀音證理
之德何名為歎三心有濃淡四時解不解意
謂觀音雖少稱名之時解心現前六十雖多
供養之時解心不發是故多少得福力等此
之二釋皆在持供心之優劣歎德遠矣五有
緣無緣父母有生育之緣故供之福深毀之
罪重路人無緣故淺文雖不斥理亦全踈豈
可觀音但與衆生有緣而已二今明下明今
義是二初明今立義二初約實際釋一多人
法皆無性相二空既顯一實斯彰存則假實
暫分亡則一多齊致存亡不二方名正等二
一中下以經偈釋舉華嚴偈釋今經意良由
一與無量俱同實際故互能圓解也以實際
之多生觀音之一故非是一以實際之一生
河沙之多故非是多既其一多無決定性故
互生非實也照其事理者事謂一多之相理
謂融即之體慎勿以多為事以一為理二法
華下引本論證論以持六十二億河沙佛名
為校量者古云論誤蓋不解論意也今具引

論文并判點解釋方曉其義論云受持觀音
名與六十二億恒河沙諸佛名彼福平等者有
二種義一信力故二畢竟知故信力復二一
者求我如觀音畢竟信故二生恭敬心如彼
功德我亦得故二畢竟知者決定知法界故
法界者名為法性初地菩薩能證入一切諸
佛平等身故平等身者謂真如法身是故受
持觀音與六十二億恒河沙諸佛功德無差別
豁云以此驗知須依圓釋何者於二義中
信力約事畢竟約理事理相資方成所念如信
力二中既云求我身如觀音即指化身又云
觀音功德我亦得之乃指報身願齊報應方
乃成念但念果德者何必議理故次義云知
法界等次引證位即是初地且引分證令人
識之故知若念觀音三身須却以念佛校之
若以念法身論之縱引十方諸佛其功亦等
何但六十二邪所以論文雖似舉經乃是增
句釋義亦如方便初加難解難知欲說大法
乃增三句而為中釋今六十二億菩薩加以
佛釋二又約下的觀釋雖三種觀俱受修名

而中是性是故得云二觀發中二觀實不等者破立不等也雖乃不等而二皆是中道之德二與中道畢竟不異中道既等二豈不等是故言空三皆是空假則皆假中則皆中乞人難勝其實不等亦以此二同一法性是故等也三結成此但通云受持名號以正格中言一時故復引大品一華供佛以類一時持觀音名其善流入法性海故如海無盡言至畢苦者二死盡也蓋言成佛散華之福猶尚不盡大章第二問答二初標章述意二初標

章二前問下述意二初述前科稱名常念及以禮拜三業現前故曰顯機菩薩以此為所觀境法身靈智即始本二覺分合之真身也望於衆生即能觀智乃以此知冥應拔苦即此境智而為因緣亦名感應以此因緣名觀世音家說已領二今問下示今意乃明觀音意業鑿機身業現相口業說法既令衆生知覺見聞故云顯應而且不說衆生三業修行之相此由宿善冥伏在懷乃能致感故曰冥機通釋十雙即當法慈福應珠顯權跡緣斷

十隻之義二分科釋經二初分科二一云下釋經二初問二初示三業文方便問意者非是道前取理方便正當證後鑿機方便二此是下明三業德二初通釋三業二初標列三義二三不下解釋三義三初釋三不護二初法作意等十字是其護義實不兩字彰於任運然須不其三惑之護即能三業任運度生二譬如下論二三無下釋三無失不護顯於思義寂絕無失彰其運會稱宜得三悉益即會事也得第一義即冥理也三三輪下釋三輪二初徧示三輪三業應機旋轉自在能為衆生摧破三障故名為輪二雖普下釋不思議化二初約義釋相心體離念即是法身本性智慧今雖垂應委悉被機而能稱本離於思念故於法身無所損減二淨名下引經證釋分別諸法證於垂化於義不動證不思議即理而事名不動而動二問意下別明示意二初問二答若隨自意無能測者若隨他意蜺蟲亦知又無機者不測有緣者令知二佛答下答二初分經二初別下釋義三初別答

二初懸示經意三初明諸身皆答三業二初釋相二初以三答三二又但下約二答三二初現身具三二若說下說法具三不知樹木風吹作聲口兼身業其義易明故不言也二二釋下結示二從別下以諸身東對十界二初約義示若據身說理合齊等但約經中結說文少故云十九如八部四衆但結一說耳二而文下足闕文二初明菩薩二初叙他四解二若三下今取古本若指上品今品那闕若云脫落餘何不脫若言觀音即是菩薩不須更現妙音菩薩何故更現故云三解皆有難也若依古本即今品文菩薩一界為化義廣最不可闕二又無下明地獄二初叙三釋若指上品亦可為例其次二釋人之局情耳二今明下明今有義二初依總答明有總文既云現種種形豈可無於地獄形邪二又請下據二經明有請觀音經遊戲五道文先明地獄方等陀羅尼經說婆數大權示為商主堅執邪見殺羊祀天生陷地獄於地獄中說法教化九十億罪人來至佛會皆令得道耶

言代苦不論說法况復論云多作佛身豈不
說法三今通下約諸身對機四句二初釋相
二初通示四句經云衆生應以佛身得度即
現佛身為獨現佛為兼餘身同度彼生又為
一界獨感於佛為兼餘界同感於佛諸身乃
至執金剛神能應共獨能感共獨不可偏執
故今通就十法界應對十界機一多相對立
以四句方見經文感應之相二別對三相不
唯感應多少成於四句人法因果亦有多少
故須更立兩重四句初機應四句二初若妙
下釋四句四初一界度一界三即下三土以
現佛身必徧三處蓋等覺下至于凡夫皆能
感佛故須三土以明其應初實報能度所度
純一佛界二方便土就本而說故曰五人生
彼土已沒其異稱以皆求佛是故感應亦純
一界三同居土且明寂場圓機感佛不論形
類及兼別機是故亦當第一句也二若寂下
一界度多界更以寂場對於次句不唯形異
亦乃根殊能感雖多能應唯一問何不二酥
對於次句那將初乳配兩句邪答本論佛界

度於多界二酥之佛勝劣相合鈍見劣身尚
是偏空體非佛界故以寂場一中道佛度於
圓別佛菩薩界及五道形方名一界度多界
句三若有下多界度一界諸時諸會三乘八
部翼從世尊共化一機或諸大權共成化事
或佛自徧現而度一機若有一人應以十界
身而得度者觀音即現十身而為說法四若
佛下多界度多界文中且約作十界身徧入
諸道而為此句若委論者或有多機同在一
處應以十身而得度者亦隨彼現也用此下
歷五味若就根性為能感機就所證體而為
能應則乳唯得一界度二界醍醐唯得一界
度一界若就形相為感應者則味中各有
四句既云應以何身得度知正約形為感應
也學者應知約土約味別對句者欲易解故
若見一多四句相已一切時處處應自在作二
復次下人法四句上之四句以人對人今之
四句以法對人此由經云而為說法故須更
論人法四句初句云善財從百一十者所歷
之城也知識即五十三人也雖帶人辯意在

所說法異二三兩句可見第四句云一道出
生死而言多法者蓋於法法開佛知見以開
十界十如皆是實相即不思議之多法此四
能被多少之法雖引諸經皆顯觀音能應之
德三復下因果四句上二四句對機說法法
須修證從因至果自若不然他何所効如轉
四諦滅我已證道我已修故諸身說一一皆
有因果始終方能被物故四句中戒善麤略
感報亦然故因果俱少聲聞因中凡分內外
聖有見修證助行法徧於三藏而只證得二
種涅槃故因多果少獨覺不稟三學行法但
觀彫變頓成果已能具種種神通化事故因
少果多菩薩修因時長行廣及成佛果二智
萬德故因果俱多此等皆是悉檀示現修因
證果大略如是三觀音下結示二初結歸聖
能二有人下叙他斥局雖因果迭論一多互
說不能顯於權實體相今以十界三重四句
望彼之義塵埃相殊二舊釋下科釋經文二
初科經二初舊科二初分三枝末二若爾下
釋疑問答二今明下今科二一明下釋義八

初聖身四初佛身三初垂應相狀二初約身
簡定二初定應化則變化歛然而有歛爾
而無蓋是暫時益物相也應則應答同物始
終如極樂人民壽不可數佛同無量此土壽
促佛同八十有降生日有入滅時即八相佛
也若尋等者棧列三乘八部四眾至金剛神
究是一期化物之相知非歛爾也二問何下
揀真應二初問因向文云妙覺法身應於三
土說法被機既本是真佛何用垂應方說法
邪二答雖云多種宣出四身法報應化法身
則速而難示應化則近而易狎報身則亦遠
亦近智同法身像屬勝應般若讚云應化非
真等者此以真法而奪應化是則無相之相
方名真佛無說之說方名說法據妙覺法身
等者此據住上品寂光方是真法上地菩薩
亦莫能觀以等覺還皆住果報並依業識見
佛若望妙覺俱是勝應故云真法淵遠如妙
音等者問妙音東來先現八萬四千眾寶蓮
華文殊見已而問於佛據此亦是不識應相
那忽引證不知真身答斯乃見跡不識其本

即是不知真身也故下問云是菩薩種何善
本修何功德行何三昧即真法也二若從下
就土分別三初實報二初示應相圓滿相好
者如華嚴如來相海品及隨好光明品說十
蓮華藏世界微塵數相一皆以妙相莊嚴
說一實諦者若約教道實報猶有別教根緣
亦說無量四諦今約實論也二示機宜四十
一地皆與妙覺分同體用故不可以九界之
身并劣應應之二復次下有餘二初論有無
二初大小有無方便實報二土俱受變易生
死偏目此者上土分破此中全在從強受稱
也小乘不說常住佛性見思若盡果報永亡
大乘談常故三界外更立三土無明全破則
居寂光分破實報全在有餘五種意生身即
全在者也楞伽但明三種意生身今家約義
開為五種且三種者一入三昧樂意成身此
擬二乘入空意也二覺法自性意成身此擬
通教菩薩出假意也三種類俱生無作意成
身此擬別教菩薩修中意也若開為五者於
三昧開兩教二乘於覺法開別教十行或作

七種兩教二乘各開為二不云別教十住者
義同二乘入空故也若論九人生方便土更
取別教十住及取圓教十信攝入三種意生
身中以未斷無明未生實報通言意者以未
發真皆是作意成之以生並從果說此依妙
玄并輔行撮略而辯二釋論下經論定判二
此應下明機應二初明但示兩應初示勝應
者問前實報身而云此應非餘土堪至此那
云圓滿相海如前實報答彼應真機與應分
合此應似機與應未合此猶作意彼則任真
能見既殊所見寧一但為此機無明已伏或
少分除故用報相引令入真云如前者稍似
實報非謂全同二示劣應者問此土一佛示
於勝劣兩種相貌與同居土專持丈六合身
之相同異如何答方便兩應但說次第及不
次第第二種大乘五種意生其上稟教雖有利
鈍既皆稟大學佛智慧俱知佛身是大覺性
能修中觀伏無明者見相則勝若在二觀未
伏無明見相則劣相雖勝劣只一尊持故非
合身若同居土說通教時鈍但見空故感丈

六利見不空故感尊特大小二機於一佛身見解有異故名丈六尊特合身此純大見故不名合二何故下明唯被二機二初總示二若圓下別示言圓人無明未破者即七信已上言分破者仁王般若說十地感有三十品

既於一地自有三品是知圓聖四十二位皆有三品初住三品即第十信三心用觀而對破之初心用觀對於上品破則中心中心用觀對於中品破則後心後心用觀對於下品此品若破方名初住生實報土今云分破猶生方便即第十信中後心也如等覺人住於後心經歷多劫方破下品證入妙覺別九向位十向初心俱名未破第十迴向中後二心名為分破此圓別人俱修中觀伏破無明雖生方便其根既利感佛勝身說圓頓法別第

同居之釋此為二初釋相二初通明二土二根二初明所感二相三初二土淨穢論土淨穢有橫有豎若以分段對於變易為淨穢者則約通感盡不盡說即豎論也如釋論云出三界外有淨國土聲聞緣覺出生其中若於分段自說淨穢則約五濁輕重相對即橫論也今以極樂及善淨國對於堪忍是橫非豎故使淨土有見思毒無惡道名毒非苦因則見與煩惱二濁輕也果報嚴淨劫命輕也衆生居此有何鄙稱彌陀願行攝之故輕非是斷惑方生其中以世慈善五逆稱佛亦能生故娑婆穢相目擊可知此是橫論淨穢二土而此二土皆有凡聖凡如前說聖有二種謂應來聖有修得聖二土皆然二兩根利鈍濁重之土論悟道根自有利鈍濁輕土根亦有利鈍以土對根故成四句三五濁輕重身形至卑小即東生濁時節羸險即劫濁餘三名顯淨土不爾者如大本疏問云既言五濁何者是五清答準例邪正三毒邪是五濁正是五清他方淨土無邪三毒則五障輕也二何

故下明能感二行言福德者即三種福也如觀無量壽佛經三一者孝養父母奉事師長慈心不殺修十善業二者受持三歸具足衆戒不犯威儀三者發菩提深信因果讀誦大乘勸進行者此三種業三世諸佛淨土正因彼疏云初業共凡夫第二共二乘第三是大乘不共之業彼經云欲生極樂國者當修三福故今云多修福德不多修福為二土行就此福而論也二若穢下別示穢土二根二初示乘戒四句二初立句相戒論十戒唯取不戒不破不穿不雜此之四種前三事戒後一事定皆人天因不取隨道無著智所讚自在隨定具足以此六種雖名為戒體是三觀自屬於乘乘論五乘不取人天以其二種雖名為乘不動不出體是漏善事戒所攝唯取三乘以聲聞等該於四教是入理智雖分深淺皆能動出煩惱生死故得名乘今以四戒而對三乘論於緩急以成四句二戒急下判所感乘戒約過去機感約現在二機有下明大小二根二初通明大小感佛不問事戒有持

有豎但論習學理乘大小是故文中置戒明乘故涅槃云其戒緩者未名為緩於乘緩者方名為緩以戒緩者唯失人天若其乘緩無解脫路乘分大小昔為偏真修觀行者今作小機唯感劣應佛之形聲昔為中道修觀行者今作大機能感勝應佛之形聲言降神等者如來昔於大通佛所覆講法華與無量眾生作一乘因中間退大淙著五塵佛恐墮苦遂以小乘而救拔之或用衍三而引導之如是大小種種成熟堪於今世悟入佛乘是故如來為此一事出現於世然其機發復少差別故於一代而分五時有機堪能直入於實有機但能迂入於實雖此二類熟在一時故於華嚴頓談圓別被二種機此機從始即見勝相若於中間習小深者雖於今世入一佛乘而小先熟故為此機示現劣身初說三藏諸味調熟來至法華方開佛慧此機於始唯見劣身故降母胎即示兩相問華嚴頓後方施小化譬如窮子急追不至徐語方來前頓後漸其義善成今那忍云降神母胎即示兩

相答諸文所論初頓次漸蓋是化儀施設之語今此所說大小雙應終歸一乘方盡鑿機始末之事如方便品思無大機念欲息化諸佛勸論方施小乘次文却云無量劫來讚涅槃法生死承蓋我常是說思故思機然後施小此等之說皆是儀式不可據此以難今文預鑿羣機原始要終度物之意也二頓機下別示大小得益二初大機益相一類眾生大種先熟即感勝應入胎住胎出胎成佛其相皆勝轉一實諦即華嚴部頓說圓教既兼別教故云無量被經預叙一代始終故立譬云猶如日出先照高山次照幽谷後照平地今家義開平地為三對於涅槃五種牛味高山大機能感頓教日光前照即有次第及不次第見佛性也若涅槃中譬從牛出乳次第五味則對一代五時教味次第相生今明頓機能見佛性是故兼用食草之譬乃以雪山譬舍那佛忍草譬十二部經牛食譬大機修觀即得醍醐譬見佛性

- 觀音義疏記卷第三
校勘記
- 一 底本，明永樂北藏本。
 - 一 六五七頁上一行書名，清作「觀音義疏記卷第二」。
 - 一 六五八頁上末行「究然」，南、徑、清作「究然」。
 - 一 六五八頁中一二行末字「利」，南、徑、清作「利」。
 - 一 六五九頁上三行第五字「乃」，南作「及」。
 - 一 六六〇頁中二行「二云下」，南作「云云下」。
 - 一 六六一頁中一二行第一三字「普」，徑作「音」。
 - 一 六六二頁下五行「因果」，徑作「次因果」。
 - 一 六六二頁下一五行第七字「三」，南作「三」。
 - 一 六六四頁下二行第七字「三」，南作「三」。

一
六六五頁中卷末奇名。圖作「親
音義疏記卷第二」。

觀音義疏記卷第四

約二

宋四明沙門知禮述

二若小下小機益相四初酪益二初明小機應即是小種先熟之者初感劣應始從入胎至于成佛其相皆劣拘隣或鄰兒或僑陳如此五人首也其四人者即阿鞞跋提摩訶男拘利太子初於鹿園證四諦理名得甘露此乃佛日次照幽谷二既非下對大甄揀二初進對法華揀悟初教得道雖曰甘露既非第五醍醐之味豈得度於二種生死故未名得度故云等者引此經也但用一門解脫虛妄見思之縛其實未得一切境界解脫塵沙無明惑累其至靈山方證斯脫二未堪下退就華嚴辯機二初於大名乳此中乃以證小之後遇大不聞以驗在凡機不受大以聲啞文在經後分其時仍長義當方等般若之時亦可通在鹿苑之前是故迦葉却叙小機蒙大擬時迷悶躋地以後顯前機未堪大其意宛然雖有冥益其如見愛熾然現行故機在華嚴全生如乳二聞方下於小名酪急追付財

稱怨大喚徐語除糞歡喜隨來乃施方便說三界苦以畏苦故斷見思集既華凡成聖名轉乳為酪次聞下生酥四教俱演橫攝眾機小聞彈訶漸能慕大密得通益鈍根菩薩益同二乘調此等機得生酥味應知約教明五味者不取濃淡但語相生以其頤乳即醍醐故若約機者有濃淡義然就三乘極鈍者說為此一類於彼華嚴全無顯益如鯉血乳說三藏時此機成酪次第漸濃至於極味次聞下熟酥不談三藏具示衍三利根之人入圓者眾聲聞至此被加轉教既於真空具談萬行故令鈍根冥得別益約調漸機名熟酥味四次聞下醍醐二初法華二初明三乘皆得成佛捨前三教方便四諦但說一實無上之道復開三教方便之門皆是一乘真實之相乃是此經待絕二妙談茲妙故方令二乘焦穀更生三教菩薩權疑未息是故無一不成佛者二故云下證一代俱入醍醐若大機先熟華嚴初見即入佛慧若小機先熟即須漸引今聞開廢方得佛慧初得今得皆是佛慧

俱譬醍醐但彼兼別至此純圓二若復下涅槃開顯之意法華具彰執權之機大陣已破更須涅槃收其餘黨故法華後復談般若調熟其心令於涅槃得醍醐味是故彼經就般若部後分結撮五味次第云從摩訶般若出大涅槃說勝三修者彼經明三種三修一邪二劣三勝邪即世間邪師所教常樂我也劣即依佛半教破於邪執謂無常無樂無我也勝即依佛勝教破於劣修謂常樂我也法身常恒無有變易遊諸覺華歡娛受樂具八自在無能過絕如是修者入秘密藏名勝三修二是為下結例三初結佛身二或示下例餘身佛身既能說五時教若示餘身亦於五時引諸實行隨味而轉復須論於示現多身度於一人或一度多或一度一或多度多約人既爾人法因果多少相對各成四句故初懸叙立三四句方盡身說感應之相三穢國下例淨土如安樂世界菩薩無數聲聞亦然良以法有頓漸是故人分大小具如九品生彼土後入大小位皆由聞法驗知應彼淨土度

生須論漸頓二種身說二此中下本觀慈悲
如上所明三土垂形五時化物穢指釋迦淨
約彌陀二佛化事教文備彰以顯觀音示現
佛身與此不異分真究竟體用同故果用若
此豈無本因故今却尋本觀誓願是修別圓
觀行之時起慈悲誓期徧法界現身說法度
諸衆生今住寂光本誓所熏徧三土形聲
利益例前赴難本誓文中已備說也三問經
下簡土名體二初辯土名二初問娑婆之名
翻為堪忍於同居中尚不通淨那得具約三
土釋邪二答菩薩舉一以為問端如來稱法
周徧為答故云以種種形遊諸國土橫亘十
方豎徹三土故言諸也皆是觀音應身遊處
此約如來答過於問據文釋也若更約義其
相宛然何者經示方便及實報土不離娑婆
故云若聞長壽深心信解則為見佛常在者
闍崛山共大菩薩諸聲聞衆圍繞說法既云
常在者山則劫火洞然此土安隱復以菩薩
共諸聲聞而為聽衆豈非娑婆即方便土復
云又見娑婆世界其地瑠璃乃至樓觀皆悉

實成其菩薩衆咸處其中既云又見即非前
處唯有菩薩不共聲聞即純菩薩而為僧也
驗知娑婆即是實報此文皆是四信妙觀即
於堪忍而見二土觀音深智遊於娑婆豈容
獨應同居穢邪二問二下明土體二初問大
論云出三界外有淨土聲聞辟支佛出生其
中受法性身非分段生即方便土也小品云
法身佛為法性身菩薩說法其聽法衆非生
死人但云菩薩不共二乘即實報土也二土
不同皆稱法性云何分別二答小乘灰斷無
界外生論云出界復云受身此據大說大乘
法性體本常住即是一切色心之源何者小
謂色心因見思有故因縛斷其果未忘大說
色心因惑生滅不因惑有體是法性見思若
盡無明全在則當真諦法性色心方便生滅
無明分破本性分顯義當道法性色心實
報生滅無明究盡則復本性常住色心離生
滅相常寂光也今明方便及實報土法性名
同約斷惑論真中大異二次明下菩薩二初
明應相二初輔佛不同橫論四教豎則三五

同居四教各有教主各有菩薩輔化機方
便二教實報一圓各須菩薩輔佛追緣二赴
刹下赴緣有異大略而分頓部根利漸教根
鈍若委論者頓中別鈍漸中圓利所說之法
隨機廣興輔佛菩薩亦隨改轉不可文備宜
準教思二此中下明本觀佛章略述二支佛
若論獨覺既不值佛稟教何能說法欲化衆
生但現神變今云說法乃論佛世稟因緣教
者也此明權示亦引其類隨味而轉同聲聞
也四次明下聲聞二初明所現二內祕下明
能現前列所現全同實行今明能現知是大
權此中有四初能現意外示權跡意在莊嚴
涅槃雙樹言雙樹者四方各雙東方一雙一
枯一榮南西北方亦復如是東方枯榮表常
無常南樂無樂西我無我北淨不淨如來於
中北首而卧入般涅槃則表雙非常無常等
經文略舉因中六人即是身子目連空生那
律迦葉阿難及果一人即如來是此皆善能
莊嚴雙樹斯蓋如來與身子等久證三德欲
令衆生得入祕藏雙非常等真四德故初於

三藏主伴相與同諸實行殷勤修證無常無樂無我無淨成四枯也次於二酥褒圓折偏恥小慕大說菩薩總引諸衆生破於無常修學常等成四榮也至法華會及今涅槃引諸衆生皆同證入非枯非榮中道四德大般涅槃經示主伴一代化功今已成就乃於雙樹中間涅槃而表顯之故云六人及以如來能嚴雙樹觀音示現聲聞之身其意如是二次引下能現人善財所見諸善知識如海雲比丘善住比丘現聲聞身說別圓法二乘機扣即說藏通既住不思議法門何所不說此合今文人法四句三次引大下能現法上總約法彰能現人今此的示現小之術故引大經四種之智觀十二緣得四乘果觀音若修別觀則次第用四智觀緣若修圓觀則一心用四因緣智而於一一皆起誓願度諸衆生不取四相不捨四法不取故非有不捨故非空雙遮二邊即無緣誓雙照生法即四慈悲今行願成故徧法界現四形聲普應一切今於四中的取下智為能現法四問下寄料簡二

初問因前分別以十界身應十界機一多交互雖成四句而終有佛度於佛界故有今問答中等覺度初地者約別教義也以圓六即佛義太寬別教登地佛界義顯何者別教三賢用於三乘所修觀法入地證中迴超九界

始本分合體用同佛故然是分證惑必厚薄智論淺深是故上位現化他佛度於下位自行之佛取譬人中師度弟子須知能度之佛或現八相或坐華王所度之佛必作因身以佛威儀非稟法相故四教佛皆無師智又今

一往且云等覺度於初地若本下跡高可云初地度於等覺以示佛跡是妙覺身乃由極果加被故也二二明下天身六初梵王二初釋名相二觀音下明本觀此天依正多是白色觀音因時觀於白色即空假中住白法界即是此有真常我性名王三昧不取不捨者不取此禪有相謂見思也不取此禪空相塵沙也不取此禪亦有亦無相非有非無相無明也則不隨三惑生於此禪三土也以不捨故即能應為凡夫梵王同居也復能應為方

便梵王即阿舍云已證三果將入方便土也復能應為寶報梵王即仁王云證七地故說出欲論亦三惑欲也四句現身即是感應一多相對以成四句以權引實引三土實行人也具如佛章下去諸身皆應例此二帝釋三自在四大自在五天大將軍闍釋毗沙門以可見故三小王下人身五初小王二長者十長人之德如大本疏第五云世間長者備十種德一姓貴二位高三大富四威猛五智深六年者七行淨八禮備九上歎十下歸姓則三皇五帝之裔左昭右揖之家位則輔弼丞相鹽梅阿衡富則銅陵金谷豐饒修靡威則嚴霜隆重不肅而成智則曾如武庫權奇超拔年則蒼蒼獲獲物儀所伏行則白珪無玷所行如言禮則節度庠序世所式瞻上則一人所敬下則四海所歸內合如來十種功德及觀心十德具彰彼疏三居士四宰官五婆羅門四次列下四衆比丘者或言有翻或言無翻有翻者此云除饑衆生在因無法自資得報多所饑乏出家戒行是良福田能生物

善除因果之饑乏也無翻者名舍三義一破
 惡二怖魔三乞云云比丘尼者比丘同前尼者
 此翻女也優婆塞此云近事男優婆夷此云
 近事女以受歸戒堪近事出家二眾又在家
 二眾或翻為清信士清信女五婦女六童真
 七八部八初天二龍三夜又四乾闥婆五
 阿修羅六迦樓羅七緊那羅八摩睺羅伽
 八金剛二初釋相二問答二初問二答第二
 總答三初牒章示文意二初牒章二示文二
 初名下依文明義廣二初依文釋二初明垂
 應徧三土就同居說十方土異約上二土則
 無異域故同居對方便一異分之方便對實
 報融不融別實報對寂光相無相簡若同居
 中眾生種類塵沙莫喻觀音悉能示其三業
 而度脫之經文所列三十三身蓋略示也欲
 彰周徧故總示云以種種形遊諸國土度脫
 眾生也二以種下據總文示三廣不明三廣
 但依別答則成限局觀音應化矣二言雖下
 結義廣三善財下據義顯他狹二初明文廣
 義狹二斤連義立宗若尋今意一菩薩身能

現十界復云以種種形遊諸國土度脫眾生
 三廣義彰不可思議說經文明示普門示現佛
 意今知本性發明就何文義云夢幻不真乃
 是剛然賤挫妙典故知此師但見文略不究
 理圓故作斯判矣第三勸供養二初標章立
 意二初標章二佛答下立意二初明始終相
 稱二初示今立章二初前後皆三二初叙前
 三二佛答後下示今三二而總下明總別互
 舉二有人下斤他傷義前三後三始終開合
 各得相稱若以總答為歎德者則令後三義
 不相稱佛以總答廣前別答若廢總答則令
 三廣義意不顯故云傷義二問後下問答釋
 疑二初番二初疑前無奉旨二答默念成機
 二初明默念前勸持名唯令心念是故受旨
 但當冥默後勸供養必假外物以表內懷是
 故解環而為法施二又欲下互成機前陳三
 業已是顯機奉旨默念更成冥感今但宿善
 即是冥機奉旨解環即成顯感前後互現各
 有深致二番二初問以機難應二答以機顯
 應二初勸下依文釋義二初分文二先稱下

釋義二初勸供養二初稱美二出供下出意
 若佛頂首楞嚴經明十四種無畏功德即以
 救七難赴二求免三毒等為施無畏今品既
 在第二問答之後明施無畏似用現身說法
 為施無畏若據文云於怖畏急難之中能施
 無畏亦可總該前番問答是則真應二身俱
 為能施冥顯二益皆得無畏二奉旨二初科
 二經文下釋六初奉命二初釋解環二初事
 釋二初評眾寶文二若依下釋百千價二初
 問經以事環表於行環諸地功德莊嚴法身
 既有階差故以世寶貴賤為表今無盡意入
 位既高瓔珞合用無價之寶豈可止直十萬
 兩金二答言百千者略舉多數如云百姓豈
 局一百萬民亦然約位辯瓔必無價也二若
 就下觀解所言百千乃以事數表於理觀豈
 專約事定其多少瓔是所嚴故表中道此性
 德也全性起修故能嚴行皆無著也此行稱
 性如瓔在頸而言解者菩薩雖有上求下化
 一切功德未始不與常捨相應欲示眾生常
 捨行故乃解瓔珞而為施也大集蓋明行瓔

嚴理一地成萬者了達一心十界百法百界
十法千界萬法此之萬法性本具足全性起
修轉名萬德即三學六度三昧總持神通智
慧四等四攝三念八脫十力無畏十地悉能
分證萬德即成十萬故知言數不專事也二
法施下釋法施二初舊取重法施因重聖法
故行財施是則財法分為兩派理豈然乎二
今明如法施法是三諦圓常理性今體財即
性諸法趣財是趣不過財尚巨得云何當有
趣與非趣故財與法無二無別財外無法法
外無財豈唯財爾施及受者皆空假中無非
法界如是乃名以法界心對法界境起法界
施於財下引淨名經以一瓔珞分作二分一
分施與最下乞人一分奉於難勝如來而作
是言若施主等心施一最下乞人猶如如來
福田之相無所分別等子大悲不求果報是
則名曰具足法施彼疏釋云此即觀所施田
入平等法界無有二相成無緣悲具足一切
佛法不求緣修之報即是具足法施之會如
此明文諸師何得但約說法以明法施疏文

彼經居士觀於悲田法界等佛今無盡意對
於敬田既稱法施豈不等彼一切眾生耶二
不肯下不受二初事釋二觀解不受三昧即
畢竟空一心三觀破無不徧以即空故不受
於有以即假故不受於空以即中故不受二
邊照空假故不受中道如是不受在一心中
方離次第及以但空以五不受義徧行門應
當料簡三重白下重奉三義解惑前二自行
後一利他此猶事釋以無等者復約理觀求
觀音受何者圓論不受則於諸法無所遺故
畢竟不受即畢竟受故云以無所受而受諸
受四佛勸五受施觀音本地唯佛能知今現
因身須求極果故雖受施迴奉敬田以一瓔
珞作二分者表於一行必具二因理則正因
事則緣了事理不二名曰妙因能成二身不
思議果法無增減而能出纏性即修故報有
斷證然匪功成修即性故若其然者方曰事
理之因趣於法報之果不論應身者因人趣
果合表二身法報若成應用自發六結德文
後重頌什公不譯諸師皆謂梵本中有荊谿

云此亦未測什公深意續高僧傳云偈是問
那崛多所譯智者出時此偈未行故無所解
荊谿亦於輔行記中引還著於本人之文故
知具釋理亦無妨近有天竺寺式法師分節
其文對於長行二種問答宛如符契今依彼
科略消此偈偈有二十六行分三初一行雙
頌二問二初一句歎德世尊具相誠由萬德
之所莊嚴是故歎相即是美德次我今下三
句雙問二初一句合上二問長行先問得名
因緣次問三業遊化之相今既重頌豈關後
問故知句中問彼兩字兼合次問也二佛子
下兩句別頌初問文甚顯著二具足下二十
二行雙頌二答二初二句經家叙緝綴之語
合當直說今為偈者或集經者乘便頌之或
是增多以偈翻之貫散無在二汝聽下正頌
佛答二初一行半加頌總數願行汝聽二字
勸令審諦觀音行者一心三智觀彼類音令
無量苦一時解脫即是已成利他行也不動
真心垂形三土方名善應處處現往故曰諸
方此二句總數所起真應二身次則總論能

成行願初明始心四弘願廣復示行行經劫
 難量以誓深故長時不退以時長故值佛唯
 多隨佛作為方名侍佛修諸佛行也一一佛
 所皆發淨願後心別願也若不爾者安得真
 智徧拔眾苦安能應身普度一切二我為下
 別頌二答二初頌初答觀音得名二初一行
 頌總答舉要言之故云略說聞名故稱口業
 機也見身故禮身業機也心念正當意業機
 也上明冥應今云見身二應具也亦可見於
 妙智之身不虧冥應長行總答機但稱名而
 別答中機具三業至今重頌總中三業別但
 心念綺文互現頌之巧也二假使下頌別答
 二初十二行頌七難十二初一行頌第一火
 難如前疏釋下去諸難皆可例知問上長行
 中求離三毒常念觀音疏云常念乃是正念
 體達煩惱即是實際無能無所今偈那云念
 彼觀音彼此既分豈忘能所答圓妙之教不
 可情求文似相違義歸一揆即於無差而說
 差故豈有差別異無差邪今文言彼義當兩
 向若就佛說觀音為彼即是師弟而分彼此

若就眾生念彼觀音此乃感應而分彼此時
 弟感應妙教詮之皆是法界一一圓融眾生
 乃感心中彼佛諸佛還應心內彼生此教行
 人或遭苦難念彼觀音豈謂能念異所念邪
 以知皆是法界故也達彼觀音即念而具既
 知即念有何能所故彼此雖分能所俱絕是
 故偈文雖云念彼與上正念全不相違問求
 脫苦難心念觀音一切機緣俱能感聖今釋
 念彼那但約圓豈果報等機全不能感答王
 三昧力救一一難皆論十番始離惡報終入
 寂光十界眾機誰不蒙益疏釋前答此義備
 彰頌開七難而為十二各合具明十番感應
 但以部意正在醍醐是故長行佛示意機唯
 今常念常念必須絕於破立今聞重頌念彼
 觀音必合疑云前今絕所今教念彼豈不相
 違故須約圓釋此伏難彼此即念能所豈存
 學者應知觀音應物雖無所遺今宗示人唯
 在妙觀是故前疏釋乎意機全廢餘塗一向
 圓解至今重頌念彼觀音豈可異前自從漢
 解違大師意勸今學人若說若行勿離圓觀

一苦一樂常念觀音既成妙機何莫圓應一
 實事益念常需二或漂下一行頌第二水
 難三或在下一行加頌墮須彌峯四或被下
 一行加頌墮金剛山五或值下一行超頌怨
 賊難六或遭下一行頌刀杖難七或囚下頌
 幽執難八呪詛下加頌呪詛難還著本人者
 凡咒毒藥乃用鬼法欲害於人前人邪念方
 受其害若能正念還著本人如譬喻經中有
 清信士初持五戒後時衰老多有廢忘爾時
 山中有渴梵志從其乞飲田家事忙不暇看
 之遂恨而去梵志能起尸使鬼召得殺鬼勅
 曰彼辱我往殺之山中有羅漢知往詣田家
 語言汝今夜早燃燈勤三自歸口誦守口身
 莫犯偈慈念眾生可得安隱主人如教通曉
 念佛誦戒鬼至曉求其微尤無能得害鬼神
 之法今其殺即便欲殺但彼有不可殺之
 德法當却殺其使鬼者其鬼乃恚欲害梵志
 羅漢殺之令鬼不見田家悟道梵志得活輔
 行引此云正是觀音經中還著於本人之文
 九或遇下退頌羅刹難十若惡下加頌惡獸

難十一坑蛇下加頌蛇蠍難十二雲雷下加雷兩難足前七難而為十二皆須具約報業煩惱六道四教一釋之若論所表不出六種須彌金剛亦是地種雷雨屬水獸蛇呪詛同是有情皆表識種菩薩因中於此大種修別圓觀今住六種如實之際故徧法界救諸苦難皆令得住六種本際斯是觀音證惡法性於惡自在方能任運徧赴諸難以要言之一切依正皆是觀音妙身妙心一切衆生於聖色心而自為難求救三業亦即觀音是故機成即時而應當以此義念念觀之何患不同觀音利物二衆生下一行總頌三毒二求一切衆生多於界內貪瞋邪見及以界外三毒之惑外則無於報得男女內則乏於定慧男女致招二種生死困厄是故名為無量苦逼若其能以正助為機即感真身妙智之力救於二種世間之苦疏解長行三毒二求義該一切對今重頌更無所遺二具足下頌次答普門示現二初正頌示現二初一行超頌總答長行先別後總以總結別今頌先總後

別開總出別前後互顯矣長行總答云以種種形遊諸國土度脫衆生今頌却論能應之由由神通力及智方便也若匪千如全體之用不名具足神通力也通雖性具復由廣修妙智方便照性發通故得普門示現自在十方無外三土非他不離一心徧應諸刹二種種下追頌別答上長行中別列諸身身皆三業今頌別示三業業皆徧周重頌之巧也文三初一行別頌身業普應合明十界但示三塗以下沉上也又種種惡趣通指九界九界望佛皆名為惡次別舉三塗極惡故也九界二死皆有四相漸令除滅歸於常寂二真觀下頌意業普觀二初一行明本觀慈悲有五觀字皆去聲呼具明三觀及以慈悲真觀空也清淨觀假也假從空得無見思染故名清淨又空唯自淨假今他淨故名清淨又不思議假三觀具足離三惑染故名清淨廣大智悲觀中也雙遮雙照無偏無待即平等大慧也此之三觀或次第修或不次修無不皆以慈悲合運而其慈悲皆稱觀者其意有二

者慈悲是觀如四無量心名四種禪禪即觀也觀音乃以無緣慈悲觀察衆生名慈悲觀二者慈悲之法必用三觀良以三觀能成衆行用三觀拔苦故名悲觀用三觀與樂故名慈觀故上文云即時觀其音聲皆得解脫豈非悲心用於三觀雖有二解體是一也菩薩從初至于鄰極三觀慈悲未始離念故今衆生常願修此常仰茲觀疏解長行冥顯二應因中合有本觀慈悲後譯重頌果有其文信智者言冥符佛意二無垢下一行明智光徧照三觀慈悲因中立誓也智光徧照果上益物鑒機也無垢淨光照窮正性察其本末若其不破三惑諸暗二死風火何能普益二世間機火災至初禪喻同居生死風災至三禪喻實報生死水災至二禪喻方便生死舉二不言水者中可例知三悲體下一行頌口業普說二初二句頌二輪化本說雖在口必以身意為投法本初句者為法現形本期救苦故說法身名為悲體此身先用戒德警人如天震雷物無不肅次句者菩薩以慈而為心

意無緣而被名之為妙物無不覆譬若大雲
 二輪既施然可授法二澍甘下二句正頌口
 輪說法甘露者智者云諸天不死之神藥也
 所宜至理解必無生若匪無生焉能不死本
 性常法非說那知於慈雲中澍大法雨衆生
 受者三惑焰滅以茲三音為入道門故當別
 頌普門義也二諍訟下加頌顯機長行願應
 以被冥機疏以施瓔彰顯機義今逢重頌有
 顯機文益見天台冥契聖旨事係訟庭身臨
 戰陣心憂刑罰命慮兵殘今昔克仇此時合
 會一心致感衆難皆祛亦可例前疏釋七難
 通於三障即諍訟等義談諸有及以三乘思
 之可見三妙音下三行雙頌二勸二初頌勸
 受持二初一行明智境深妙以勸常念初三
 句中有五音字皆是衆生稱唱言音以由菩
 薩妙智觀故皆成妙境三智照故音成三境
 雙遮空有即成妙音雙照空有即成世音世
 即二世間也不別而別此二音字中智境也
 梵是四等慈悲喜捨四觀照之即成俗諦故
 名梵音稱俗照機若熟若脫時節不差名海

潮音此二音字假智境也畢竟空智出九界
 情照衆生音超二世相是故名為勝世間音
 此一音字空智境也言雖次第觀在一心智
 外無音音外無智境智冥一思慮頓忘是故
 須常念者正勸持念也此之類音雖是衆生
 口業所發大聖三智照成三諦即是三身故
 勸行者念此三身言常念者如疏解云即是
 正念非破非立無能無所三諦俱照三觀俱
 亡不次不偏名常名正若其然者名為妙機
 二念念下一行明感應難測以勸勿疑上先
 舉境智次勸常念今先勸勿疑次陳感應左
 右互顯耳言念念者相續繫念也念即觀音
 深妙智境雖達常住未免遷流即於遷流照
 常境智是則念念不離觀音如大師示衆偈
 云實心繫實境實緣次第生實實送相注自
 然入實理言實緣者剎那念也次第而起一
 一皆是實觀之緣如是繫念唯慎生疑疑兒
 若生理境斯障故明聖德以勸息疑縱久修
 不成求之未應須知淨聖真資不虛於二死
 中如父如母可依可怙念持護感應必彰

然疑有三所謂疑人疑法疑自今但舉人具
 二可息勸令常念復誠生疑疑去念成勸持
 意足二具一下一行頌勸供養先舉功德方
 勸頂禮初句總示一切功德次二句別彰惠
 眼及以福聚慈為善本福救萬行結示普門
 勸修供養禮既屬身身必具口非意不行頂
 禮已成三業供養第三歎聞品功德二初持
 地歎功德二初釋聞上二益經云持地者實
 雲經云菩薩有十法名持地三昧如世間地
 一者廣大二衆生依三無好惡四受大雨五
 生草木六種子所依七生衆寶八生衆藥九
 風不動十師子吼亦不能驚菩薩亦爾經一
 一合妙樂引彼釋今持地結云以八教判方
 應今經二此中下釋自在之業業有種種大
 約論三一有漏業為見思所潤受分段土生
 二無漏業三非漏非無漏業同為無明所潤
 受變易土生此約自行受生以說若利他者
 皆以慈悲潤彼彼業同他受生三藏菩薩衆
 生緣慈潤有漏業同居業生通教菩薩法緣
 慈潤有漏業習於同居土神通受生法身菩

薩無緣慈潤不思議業三土應生今觀世音
等覺後心無緣慈悲潤於中道自在之業故
云中諦攝也應十界感十方淨穢方便實報
同彼機類現身說法故云於二諦得自在也
即普門示現神通力矣聞者能得觀行真似
微妙功德故云不少二無等下聞品獲利益
二初約四悉釋無等等疏有四節結云四悉
以明發心初釋四初世界二乘有上是可等
法佛智無上是無等法初發大心等於無等
即無等中而論於等只是等於佛智故也大
小體別名世界也二又約下為人乃以人數
用表法門刹那刹那莫不具足八萬四千淨
穢之法此一法無非實相若緣諸法作念
而修塵劫不等性中八萬若即實相無緣發
心刹那能等八萬四千究竟之法發實相心
是生理善即為人也三亦是下對治八萬四
千始終無改迷即塵勞悟即彼岸說波羅蜜
翻彼塵勞即對治也四故經下第一義前心
難者初破無明實為難事大經所讚正在分
真是故頂禮初發心即發心住也此位能具

四十一位真應功德此心超勝已不可等此
不可等等於妙覺既是真發即第一義二此
即下結上之四釋初四等果二三等理果理
不二豈有階差然約諸文三慧四悉多就位
辨故須四釋不別而別約位而明五品間慧
即超二乘不二觀成凡心等佛小果有上大
果無等小大差別故當世界初信至七位當
思慧既麤垢先除發實相似解照乎性德八
萬法門既生理善故屬為人八信至十位當
修慧內外塵沙不除自遣能以性中八萬功
德對破逆修八萬塵勞自他惡破故屬對治
初發心住三慧功成性三圓發四十二位互
具雖等較其難易初入功深此位始得真心
開發名第一義二發心下約三即顯真發名
字發者於能詮名豁然開發三種菩提願行
之心對違順境此心彌熾圓伏三惑名觀行
成若名字即縱能勤修八法成乘以未開悟
不名為發今發觀行稱名字者蓋此五品非
真非似但是信解詮妙名字於妙三諦決無
疑滯能伏無明不為境動是故稱為名字發

也相似發者因觀加功故三菩提信前開發
似於本性六根互用稍類分真如鎗比金鑽
火先暖故名相似發菩提心真心發者一發
一切發發一切方便發一切觀照發一切真
性此三菩提圓融通達不前不後亦不一時
分證三德分同果佛故華嚴云初發心時便
成正覺所有慧身不由他悟微妙淨法身湛
然應一切始從初住終至等覺皆有此發位
位轉深前之二發相顯故來經文結益正在
真發

觀音義疏記卷第四

釋重頌

宋天竺寺沙門遵式述

第二重頌是隋煬大業中智者滅後笈多所譯方入大部故疏闕釋靈感傳天人語南山云什師八地菩薩譯法華闕觀音重頌既涉冥報信有此文今扶上二番問答隨文略釋固難盡理講者但令不失上文大途梗槩何必騁異此頌二十六行爲二初一偈雙問二章次二十五偈雙答二問初問中一句歎德三句正問一句之內名體合歎世尊名也所以略舉尊號則知上九並爲三世中尊歎之要也具相質也相妙而具妙是歎辭具謂三十二滿足又可妙即是好以八十種好嚴其相今妙好也復次名實俱歎法身名是妙名相爲妙相上文云具相三十二以八十種好用莊嚴法身即此意也具此相好者即具二嚴能答我問故舉而歎也正問中初句兼於二問文云重問即重問上二段之事孰謂不然次二句別問觀音欲佛先答初章就近更徵故也亦可三句併問初章自招後答既有

二十五

真身冥益豈無應像顯赴耶故許說中雙許二番謂聞名及見身是也第二答中作三意初二偈總答二章次十九偈別答二章三四偈勸持名供養總答中初一偈正答次一偈依本觀慈悲汝聽觀音行是總答前章觀音即境智因緣得名善應諸方所是總答後段普門示現並用上總意消之次一偈却尋本觀慈誓顯今智斷十番利益本依別圓無量無作四諦起於願行由誓境深廣故弘誓如海弘即廣也歷劫顯時久遠一一劫中侍多千億顯值復多一一佛所復發別顯如四十八等一一願合法界故復云大也歷劫約堅侍多約橫一一豎中有橫一一橫中有所歷之時廣說云將此總中本誓歷下別答一一難及普門後廣作可知第二別答復二初一偈是雙許說二章聞名是許前章見身是許後章向誠聽今許說言略說者即別答也總答多合即文略而意廣別答陳列且約人界果報邊明七難等普門且約三十三身等即文廣而意略今取意略信是許別答也聞名

聞觀世音境智名也上文約四種聞釋成三慧義觀兩全可解見身即普門示現顯應三業也心念不空者明二段應益也心念屬意不云身口者此從冥顯二機攝二章語便何者初章顯機若身若口俱須域意故意能總攝也故上釋持名云口爲誦持心爲兼持爲理不失雖非口持覺觀是口行通屬口業機攝例如小彌陀執持名號一心不亂亦不妨口機下文皆云念彼觀音力例同此釋後段冥機約心爲便可解不空者縱使稱名都無顯驗冥益不虛第二十八偈正答又二初十二偈頌初章次五偈頌後章初又二初十二偈明口業機應次一行略頌身意二種機應上文七難表六大種而云假令多舉諸難亦是表此今偈加推墮二山惡獸蛇蠍此四皆識種種毒藥從人及蟲鬼識種種攝從塵體地種種攝雨雹水種種攝又合羅刹鬼難加六成十二難初一偈火難上文例作三科釋貼文事證觀解於觀中初廣約十番遭苦稱名成機致感次約別圓二種本住法門及慈悲誓願

二十五

顯前十界圖益今但略作貼文一釋餘可準
上不復備叙講者應具示其意使義觀不墮
有益來者言大火坑者上直云大火此加之
以坑大而更深意顯聖力火無淺小皆能成
難況乎大坑設使劫火從地獄至初禪如此
大坑滿中紅焰菩薩亦能或以吹滅或以口
喻或復手遮令其不燒或作涼池次一偈水
難上得淺處即能免難若加龍鬼凌亦可畏
故值死緣多重於上文彌彰聖應爾次一偈
墮須彌難如日住空顯聖力難思然但是假
設何人能到復被推等二十五設此事聖無不為
頂生人王能上妙高因貪帝位還降人間若
能稱名必有免理四一偈墮金山難五一偈
怨賊難六一偈王難七一偈枷鎖難八一偈
毒藥難大慈等愛理合均除而還著本人者
被害稱名機成須救能害無機惡心自剋非
聖使然又毒藥有鬼須得著人若不殺他必
須自害問若惡心自剋怨賊何故但今起慈
答賊害事顯但今起慈即彰聖力毒藥陰謀
反害方驗然賊亦有自害如東林老僧為賊

所斬賊反以劍自刺心入背出羣黨奔迸又
毒藥未必例皆還著有作折攝二用釋者若
二俱有機則可然若能害者無冥顯二機折
亦徒施九一偈羅刹鬼難然兼毒龍前有魚
龍及鬼此重言者龍鬼通水陸前但在水也
上文四種龍等云十一偈惡獸難十一一偈
蛇蠍難十二一偈兩電難欲益觀行者應巧
約惡業煩惱作蛇虎等法門釋之使順道理
若準請觀音疏作三義明消伏力用謂約事
約行約理對此中果報煩惱及所住法門會
之亦應可解口業機應竟第二一偈總頌身
意二種機應三毒猛感心不自在名之困厄
四類同棲各說所苦鴿說娼為最苦蛇說瞋
為最苦云女無子苦如上說或分二句對意
對身細作可了若作觀解十番為三毒所困
及約界外作順逆法門應釋應用上文意消
三毒義身業無子無修因男女乃至無圓頓
男女尋上文消之若心念身禮三業成機斷
除三毒根滿足二莊嚴未拔十界三土世間
之苦故云觀音妙智力能救世間苦亦應更

明別圖本觀慈悲云第二五偈別答普門示
現此中文狹望上別文此仍成總又為三初
二偈頌普現次二偈頌本觀三一偈結成聖
者三業初又二初一偈直頌普現二一偈別
舉所化三種法界上文列聖身至金剛神闢
地獄界此中舉劣況勝成互出耳一一身說
約四句如前又上文約三土為所應此十方
當約三土釋十方云次二偈本觀又二初偈
行願次偈觀成普益初又三二句辯觀一句
慈悲一句誠歸向真觀了空成一切智清淨
觀出假處有無滌成道種智廣大智慧即中
道觀徧於諸法名廣勝出二邊名大智體
即智慧觀此體故名智慧觀問何以智慧名
中體耶答順此經意此經以寂照合法身為
體感應為宗得作此說三智實在一心中得
不可一異悲觀等者普願通稱為觀緣諦發
故如止觀十法通名為觀次偈辯益又二上
二句明智光次二句慈光破暗照世云三一
偈結成聖者三業顯應戒雷對身業慈雲對
意業澍雨對口業戒檢七支身業為便戒淨

能拔三惡之苦故名悲體身輪現通駭動羣情復如雷震內心愛念名慈普覆一切如雲無誑而應逗會不差復名為妙意業也口輪演實相之法為甘露雨三草二木平等蒙潤三惑熱惱為之清涼廣釋三無緣三不護等如上文一一應跡一一說法皆須明別圓菩薩所住法門方有事用釋普門一番竟第三四偈勸持供養又為二初二行一句勸持二一行三句勸供養初又二初一行重舉前口業機應以為勸由由前口業居初舉一攝二所以特舉官訟軍陣者水火難稀鬼虎事寡運衰方值諍訟事眾世之諍本財色田宅日用有之勸持則要也刀杖幽執有過方遭軍陣王役事非由已又抽力相持白刃森目刀杖案籍賒死之難賊奪有財非如師旅斯亦勸之要也次一行一句正勸又二初三句約權實格量次二句結勸先舉菩薩實證實益為格量本勝彼九界權乘慈智故云勝世間音祇音塵一法以實智佛眼觀之即實諦妙音權智法眼觀之即俗諦世音此實證也緣

中道修慈名為梵音此慈能與機會名海潮音譬不失度此實益也與夫九界生法二慈作意應物豈復為類故云勝彼格量明矣二句結勸初勸常念有事理二行云若事理行成自見菩薩色法二身故一句復止疑勸也次一行三句勸供養初一句歎菩薩清淨三業從正命生故云淨聖言其堪受供養也正命是聖法人稟此法名人為聖故云觀音淨聖次別舉德以為勸由於苦惱下二句頌上施無畏德苦惱死厄怖畏處也作依怙無畏力也如幼子恃怙父母更何所畏即指前現權實身說為父母護三乘子免二死厄具一切下三句舉福田勸具一切功德舉菩薩報身敬田慈眼視眾生舉應身恩田福聚海無量總歎二田高出如山之謂聚深廣無際之謂海亦是二田所依歎法身也頂禮正勸以三業供養也身儀事顯故特舉之必具三業上文瓔珞望今乃互舉耳又此勸事普一切皆得供養百金之瓔執人可辯又能嚴尚貴所嚴豈復輕耶觀心者身業勤則增長

福德供養應身口業勤則說般若供養報身意業勤則會理供養法身云釋偈竟

宋慈雲尊者疏別行重頌附大部入藏而南方教苑不傳幾二百年矣至元甲午為教門入京於燕城弘法寺得之東歸猶至寶然不敢目秘遂鈔諸梓以惠來學大德壬寅夏五興元佳山苾芻性澄 謹題

觀音義疏記卷第四

校勘記

- 一 底本，明永樂北藏本。
- 一 六六七頁上一行書名，清作「觀音義疏記卷第三」。
- 一 六七〇頁上一〇行「初名下」，南作「諸名下」。
- 一 六七一頁中八行「料簡」，南作「精簡」。
- 一 六七一頁中九行第一三字「復」，南作「後」。
- 一 六七二頁上一二行「假使」，徑作「假使」。
- 一 六七四頁上六行第五字「焰」，南作「熾」。
- 一 六七四頁下九行「特地」，南、徑、清作「特地」。
- 一 六七五頁下卷末書名，清作「觀音義疏卷第三」。又卷末書名後，南、清有釋重頌一篇，茲據清藏本附錄於後。